

四明談助目錄

第十四本 東郭北郭

卷三十一

東郭東 錄 東四明陳山脉至七里塾塘河南北古蹟提綱

湯君廟 述 嘉靖志錢志 節錄 宋貢士林珽撰墓志

一都戎氏 錄 推官洵 通判來賓 文學玠諸傳

樓氏迂齋 述 族望表 附 新按 錄 學士昉傳

甬東書院 述 聞志 節錄 郭嘉碑記 附 勾餘土音詩一首

二程夫子學舍 述 族望表 錄 教授端禮編修端學尚書徐傳

孔夫講堂 述 嘉靖志 錄 句餘土音詩 多福講寺 述 敬止錄

七里塾周氏 述 族望表 錄 文學尚文文學召隱君容孺人金

四明談助 卷三十一

氏楊氏諸傳 并 春酒堂文一首孺人詩一首勾餘土音詩

一首 節錄 春酒堂文集序

張斌橋菴 述 說鈴現果隨錄 附 菴後補建太白樓事

木蓮藤下史氏 附 新按 錄 中奉彌鞏果齋蒙卿 并弟 連傳

獨善坊 述 嘉靖志 錄 句餘土音詩 靜清書院 錄 全謝山記

列 史縣尉彌應春坊彌寧處士公珽 并子 景祖晟祖諸傳

史氏宗祠 附 新按 錄 鄞獻表科名 列 知縣元中知府起欽傳

錢氏祖墓 附 新按 木蓮藤下分水 附 新按

櫟木廟 述 曹志錢志 錄 李杲堂竹枝詞

洪氏東皋草堂 附 新按 錄 知縣賢傳 附 稼翁詩一首

洪明府第 附 新按 錄 贈公奎明知縣圖光傳 并 逸事

賣席橋屠氏採屠氏先世見聞錄表進士養浩

施氏錄文學江濤連兄淞濤進士滄濤子于本傳

李氏森森亭墓附新按錄御史循義詩并序

芍庭錢氏述族望表附新按錄紀善安 布政奐 按察瓚

知府若賡 孝廉靖忠 訓導益忠 知府敬忠 提

學啓忠 大學士肅樂傳并勾餘土音咏錢太保事四首

鮎埼亭集記張都督廷綬輔太保事 題忠介公葬錄

詞 瓜里六幕府甬上六狂生甬東正氣錄十二公名目

又錄 州牧士驩 孝子美恭 徵君光繡傳并勾餘土音

咏錢蟄菴事 蟄菴告衣巾詩又錄公子昭繡附林監軍

日宣傳并詩又侍御肅圖 檢討肅範傳附句餘土音咏

四明談助 卷三

檢討事又職方肅遴附鮑安人傳并句餘土音詩 推官

肅典 隱君肅采傳并勾餘土音詠推官事又隱君肅臨

將軍肅繡 徵君廉子中盛際盛文學魯恭諸傳附鮎

埼亭集錢氏佞佛論 勾餘土音賦芍庭古跡七首

鎮安橋述曹志 連氏附記 東善人德章事

神農殿附新按錄李杲堂竹枝詞三首

賀成廟述聞志 永利菴述聞志

積慶菴述聞志附新按 廟堰碣述錢志

卷三十二

東郭西錄陳山脉西行至大河橋南北并泓江古跡提綱

冰廠附新按錄李杲堂竹枝詞并甕牖閒評藏雪法

鹽倉漕附新按 屋簷頭厲氏錄孝子顯祖傳

三江東楊氏錄學士簡傳 勾餘土音楊文元公舊里詩

稅關附新按 林家道頭聞述李志附新按

江東包氏述族望表錄進士莘 御史澤 知府溥 同知

梧 知縣桐 參軍大中 典儀大炯 同知士瞻 隱

君燮 孝子幹鄭 教諭之鱗 知縣旭章諸傳附古跡

義鷺塚

楊柳道頭李氏附新按錄朝散元白傳 句餘土音詩

後塘街附新按錄李杲堂竹枝詞

鮑孝子斃路述聞志孝子倫傳 下番灘述聞志 錢家道

頭聞述李志附新按 太保廟述聞志

四明談助

卷三

高階沿張氏附新按錄善士文英 處士憬 工部禮 參

政琦并里居詩九首 徵君瑞構書莊事

澄波橋河分水附新按 新河底王氏附錄 近年科名

新河述李志 演武場述聞志錄李杲堂竹枝詞

大石碛述至正續志李志 百丈街倪孝子述嘉靖志

迎春巷李氏鍾氏錄李異人奎鍾文學鳴雷傳并雙井

大埠頭張氏附新按列明府鏞 二尹澄 光祿應麟 鴻

臚子用 文學翼 明經南宿諸傳附子用曾孫嘉昂寓

海鹽子英以海鹽進士官戶部郎

王家墳附新按述甬上前族望表錄直閣庭秀通判璧傳

五河橋附新按 梅山池述聞志錄邑令王忠烈公記

太白莊述嘉靖志附新按錄李杲堂竹枝詞二首

甬東草堂述李氏文獻錄錄李賓父同友飲草堂詩

徵君廟附新按述史慎齋詩二首 棲心禪院述敬止錄

補陀禪寺述郡邑志錄李杲堂竹枝詞并記寺中賑饑事

舊鄞尉治採濤容集記 茅亭 熙春亭俱述延祐志

彩虹橋吳氏述近年科名附新按

石水缸張氏述張氏宗譜有太守誠學博聰并子姪連傳

史狀元第述聞志附新按錄贈公起揚 侍郎大成傳并逸

事又侍郎在甲傳并全謝山送侍郎歸里詩序附張解元

僑居 陳文學蕉隱軒二記

卷三十三

四明談助

卷三

北郭錄西四明分支至江北岸為府治後坐古跡提綱

青墩附新按 九十九墩述聞志

顏公渠述寶慶志聞志附新按 渠上四橋述聞志

鴈湖述聞志 游冶巷 管絃樓採前人詩註

顯德廟述聞志又記逸事 柰使君廟述聞志

屠氏祖塋述屠氏遺聞 尚書墳附新按

屠氏舊宅採屠氏見聞錄分次三四六四支 次為大司馬

粹忠之先錄教授珙傳并逸事 大司馬傳見城居第

三為少保僑之先錄贈尚書琛 少保僑并逸事 副使

倬 郡伯大心諸傳 四為太傅瀟之先封公瑜以下傳

俱見城居第 六為儀部隆之先錄贈公濬傳 儀部以

下俱見城居第

吳濤鄉宅述聞志錄太常惠傳

江北盧氏述族望表錄給事瑀 山人雲傳并朱東籬逸事

江北董氏述族望表錄文學世登 戶部守諭 貞孝道權

文學孫符 文學胡駿師儒 陽曲世英諸傳又錄續

耆舊傳書董次公集後三則附張遺民傳并勾餘土音咏

董戶部事 桃花渡李氏附錄近代科名

引僊橋名義述敬止錄屠氏見聞錄

許孝子免雷擊述聞志

名人詩歌總列錄屠田叔甬東江北歌六首 李杲堂竹枝

詞三首 勾餘土音訪遊冶巷詩一首 袁陶軒鄮北雜

四明談助

卷三

目五

詩九首

四明談助卷三十一

四明脉進城分南北東三界并城外西南二郭已詳于上  
及東郭而東郭隔大江謝山所稱江東南為支派者其脉總  
由奉化白杜來盤旋至鎮海江南之陳山沿江西行經梅墟  
自一都轉南由七里墊西木蓮藤下過塘河河北有一都湯  
君廟有戎氏舊宅樓氏迂齋甬東書院二程學舍孔夫講堂  
多福寺七里周氏張斌橋菴木蓮藤下史氏錢氏祖墓過河  
以南其脉兩分一由周孟橋過河至櫟木廟廟之左右前後  
有周孟橋洪氏買蓆橋屠氏施氏森森亭李氏墓芍庭錢氏  
宅等蹟一由柳隘過河轉西至四眼碶南經鎮安橋神農殿  
一號田沿江南行至二十都廟堰碶止上有連善人居賀成

四明談助

卷三

廟永利菴積慶菴廟堰碶等蹟所有事物詩歌遞詳于後

湯君廟

縣東五里一都相傳神諱華為侯官丞有惠政歸葬茲土屢  
顯靈異唐元和間建嘉靖志宋建炎三年顯靈戰地勅封明濟  
侯 國朝雍正十一年重建錢志相傳建炎之難神現像擔粥  
餉官軍應之不竭

節錄鄉貢進士林珽撰墓志君諱華字知新曾祖備祖賓考  
岳皆簪組相繼官列當時頗有功于國公幼耽墳籍將欲振  
于時立大來之器以晨昏是切仕不擇祿釋褐衡州參軍再  
調授福州侯官丞謀而有方簡以蒞事公之器用未盡宏遠  
秩滿寓居南方以大中十一年六月五日終于連江邑之客



第春秋五十八道路民慟風雲助悲男二人長曰宗鉉次日宗鎬女五人咸削鬣觸地哀號訴天以大中十二年歸葬于明州鄞縣龍山鄉江上里

全文見錢志金石考

一都戎氏

戎推官洵

字彥實其先漢有柳邱侯賜唐有節度使昱至宋有魏國公隱者南渡時扈駕至鄞遂家焉公爲八世孫也父黑生號北山讀書高尚公性耿介宣德九年貢于鄉授黃州推官秉法不阿屢出冤獄郡中翕然稱平持身廉潔屏一切賂遺在任七年卒于官貧不能具含斂黃州人醵金賻之

歸曹志

四明談助

卷三

戎通判來賓

字孔塘嘉靖癸卯舉人判南昌府

皆舊傳

戎文學玠

字孟常爲諸生工詩嘗與李戒庵同入西川舟行所歷奇

山水俱有詩今存蜀游草一卷

皆舊傳

戎通政上德 知縣式宏 職方澄 明經文蔚

傳俱見郡城大沙泥街戎通政第下

樓氏迂齋

城東三里張斌橋左元時所建甬東書院卽其處

甬上族望表城東樓氏別爲一支迂齋先生兄弟爲一望

樓學士昉





勉盛樵等咸助鈔以資費直闢異端氏廢屋三楹改創之于是建禮殿論堂東克己西居敬兩齋設祠二西以祠八先生東以祠迂齋樓氏自齋史氏安晚鄭氏靖齋程氏約齋許氏蓋以講道建祠均得祀也靈星儀門左右二夾室左以庋程氏讀書日程春秋本義書板右以貯穀粟地則甃甓使整日平垣則圻墁使華且固祭器書籍次第而舉是微靖齋則甬東之名湮沒而無存矣微野堂約齋則程氏之圖綿薄而難成矣微我侯則草創又安能傳之永久而弗壞哉時有先後事有難易而成之功則一也詎非天乎然其創始之謀重建之圖續成之功豈徒崇侈其棟宇華飾其牆壁以爲觀視之美而已哉蓋將崇聖祀於昭代廣聖教於名藩以續既往而

四明談助

卷三

四

開方來也游於斯瞻聖賢之遺像誦聖賢之格言心乎其心道乎其道行修而名著體博而用周將見人才之出超軼前古庶幾乎洙泗伊洛之盛豈不躋歟至正甲午十一月望日

記 俗稱二程孔夫講堂卽甬東書院

俱闕志

句餘土音賦樓賜叔迂齋

明招之學如武庫

謂呂祖謙

迂齋獨以文章傳尤長發策并持論

足爲場屋爭先鞭曾聞甌越槐黃客戶外之屨長蟬聯雨笠

風燈交兀兀東江帶艸青芊芊卒成安晚

鄭清之

與葺芷

應雙

登綸閣司王言安晚歸來報先河迂齋講塾高插天所惜當年二宰執事業不足光史編將無所傳僅文章佐王之學有未箋雁湖兄弟差爲勝蜀道遙遙遠莫前

謂李參政璧兄弟

迂齋之

學詎止此何不遙上百尺竿

程夫子學舍 族望表程氏畏齋積齋兄弟兩醇儒爲二望  
二程畏齋先生端禮

字敬叔學宗朱子務適于用初爲建平建德兩縣教諭歷  
信之稼軒建康之江東兩書院山長文宗在潛邸遣近侍  
子弟來學禮遇甚至累考授鉛山州學教授鷺湖書院旁  
有道院一日見驢跑地駟而復來默卜而發之得十餘石  
碣刻羣賢像因立堂祀之秩滿以台州路儒學教授致仕  
總管王元恭禮請爲學者師年七十五端坐而逝所著有  
進學規程頒于郡縣學

成化志

程積齋先生端學

四明談助

卷三

五

字時叔畏齋之弟至治三年歐陽元爲浙省試官第二場  
四靈賦本房得一卷詞意高迥覆考官謂非賦體欲黜之  
元爭之力且曰其人賦場如此經義必高取觀之則偉然  
老成筆也明年會試經義策冠場以南士置第二歷陞國  
史院編修官每論撰爲學士虞集所推服南宋四明學者  
多宗陸氏惟黃震史蒙卿宗朱氏積齋兄弟師蒙卿盡得  
朱氏明體適用之指畏齋色莊氣和而積齋方毅剛正凡  
舉動必合禮法人以比河南程氏兩夫子云

成化志

著春秋

本義三十卷三傳辨疑二十卷或問十卷見元史本傳其  
自序文載錢志浙江采書錄云此書說春秋最爲醇脩近  
通志堂所刻者缺辨疑二十卷

附東湖孫山長傳

孫會叔字友仁與同里程畏齋兄弟俱以師道自任共講春秋三傳于湖山間四方來學者衆才德行誼為鄉人所宗故積齋記東湖書院有云余少時嘗侍友仁孫先生講學其中欲結屋以領湖山之秀顧南北馳驅未遑也觀此則知友仁于二程為先進焉傳志

程尚書徐

字仲能敬叔子也元至正中歷官兵部尚書致仕洪武二年偕危素等自北平至京授刑部侍郎太祖詔孔廟春秋釋奠止行于曲阜天下可不必通祀徐上疏言發揮三綱五常之道載之于經儀範百王師表萬世使世愈降而人

四明談助

卷三

極不墜者孔子力也孔子以道設教天下祀之非祀其人祀其教也今使天下之人讀其書由其教行其道而不得舉其祀非所以維人心扶世教也不聽進尚書卒徐精勤

通敏工詩文

明史

黃南山先生孫存吾傳作閒中今古錄其見聞有可采程尚書仲能以文學之禍死見于存吾是錄中明史以為病卒誤矣明史經萬文季野之手萬丈精于權史而鄉里先正事竟不能審以是知史事之難仲能大儒之子在元已官至尚書不能為余闕并不得為危素悲夫結崎亭集

孔夫講堂

在郡治東五里程畏齋兄弟建以祀夫子羣弟子講學於

中今廢俗呼為孔夫港塘非是嘉靖志

句餘土音賦二程學舍

楊簡李元白宗槐堂心學於斯在其時獨善翁師友實一輩

文孫有靜清史蒙卿號別紹考亭派乃授之二程連舟得津逮

時叔談春秋經學良精粹敬叔分年程蒙求亦攸賴大程之學

不如小程未當年黌舍中絃歌發清籟太白莊高東湖深

杖屨到處有清音如何尚書忘家學屈身異代玷故林謂敬

叔子徐以元尚書為明侍郎然卒不得令終喪其象聲可惜

### 多福講寺

縣東五里宋乾德三年州民趙軒舍園作室開寶七年州刺史錢億易號興福治平元年始賜今號熙寧元年重新表穀

### 四明談助

#### 卷三

為記載敬止錄今寺址無攷

七里塾周氏族望表去縣治七里故有此稱詩人容一望

### 周文學尚文

字烈甫號松石貢生容之曾祖積學砥行著松石集

### 周文學名

字太望烈甫孫父太學生一驄年九十七孝養如一日兵

亂隱居潛心理學著述最富及門多名士如張亞魁罵其

尤著者訓長子容棄貢不試舉鴻博郡守數踵門請不赴

著有尚書疏俱三補者舊傳

### 周隱君容

字茂三一字暨堂諸生名之子也少即工詩常熟錢侍郎

牧齋稱之錄其詩于吾炙集國難後棄諸生放浪湖山世  
多傲之徐涓非其倫也先生以布衣詩人名顧其素心原  
不肯山澤臞夸篇什者卽其掾徐御史心水一事要非東  
西京人物不足語此先生未知名時首爲御史所識掄揚  
不啻口出海氛四起多掠資糧于內地御史一日游山莊  
爲土兵突至縛之去置平西將軍王朝先營索餉數萬不  
得囚水牢中親友莫敢赴先生故嘗往來海上諸營多故  
識者挺身往請之朝先握手道故遽釋御史歸而部下大  
譁謂是必周生受賂故來請或力而拘或暫而免將軍乃  
爲秀才欺耶朝先故武人忽發怒下先生獄榜掠之先生  
不屈賴坐客方君伯呂萬君旋吉百方營護而沈閣學彤

四明談助

卷三

菴亦以爲言得放還然先生足由是蹙嘗自笑曰吾今日  
爲半人因別署覽翁嗚呼由其報知己者觀之而其君臣  
父子之間可知也先生踪跡徧天下所至皆有詩喪亂而  
後嘗盡薙其髮爲僧矣未幾以母在反初服晚年已倦遊  
適有以非意干之者乃復出門時里中史侍郎立庵官于  
京招先生往已而有博學鴻儒之辟朝臣爭欲荐之先生  
以死力辭次年卒于京邸著有春酒堂詩集十卷文集四  
卷詩話一卷乃其手定之稿有一僕名介壽甚義先生卒時  
或欲以兼金賄僕取其集以去僕固執不可先生工書亦  
善畫飲酒數斗不亂談諧間作一座盡傾有翁州志一卷  
翁州死事諸公傳一卷托言焚于火人未得見今其子宛

春已卒不可問矣

耕埼亭集墓志

春酒堂記節

春酒堂者容于丁酉秋所卜以養老親而名之者也堂在郡治東七里雖無林壑幽邃之勝然面接平塍半枕流水金峩太白偕湖上諸峯黛色參差可數春耕秋穫牧笛農歌風日陰晴四時各稱每夕陽未沉漁艇直達北戶下或鯉或鱸或蝦蟇易日互見樓東西貯經史莊騷以下千餘卷唐宋石刻百餘種墨跡山水花竹數十軸容每應人所乞碑序志銘草就呈家君且琅琅讀或字句稍疑滯共推敲必得當乃已及臨池作行草書家君更喜攜容兒阿長語波磔勢家慈乃呼兩婦出脯醢益酒爲懽笑庭內外花

四明談助

卷三

九

木十餘種花時隣翁必至至必留留則隨意雞黍竟日夕不言倦也于是海內士君子登斯堂者無不以爲極人生天倫之樂無有踰于容者也容嘗索友人作春酒堂記莫當家君意家君爲詠七月之六章曰可以記此堂矣因命阿長書于堂壁時丁未四月朔日

附周孺人金氏楊氏

金名述字友之貢士容元配至孝能詩甫生女冠亂姑不忍離氏恐累姑作歌自經容憐之廿載不續後遵父命娶衛將楊公起龍女生子宛春克承家學楊氏名存宇文定著女訓

金氏素羅歌

素羅素羅兮嫁時藏病遭兵變兮伴爾亡舅姑堪避兮往  
高岡有女甫生兮累汝父之哺漿吾潔吾身兮尋亡親而  
徜徉

勾餘土音擬薤露詞

陷虎穴

周徵士救友

士爲知己死女爲悅已容感懷我友急敢畏虎穴凶果然  
需于血跟當稱覽翁吁嗟世教衰那得高誼薄穹窿防風  
有一節足見百體豐長吟老婦詩指金夫八事敬謝翹車弓指鴻

博之

徵 春風呼獨鳥秋霜鳴九鐘

用錢牧齋許徵士詩語

春酒堂文集序

鮎埼亭集

鄧山先生以詩名甬上甲于同里一時諸遺民董戶部次

四明談助

卷三

公謂其詩一畫二書三文四惟先生自序其文亦以爲晨  
窻燈夕所成之小篇也先生子宛春乞予銘阡又屬予論  
次其文予爲去其十之五而存其有關名節者數十首次  
爲二卷足以想先生之生平焉蓋文之足傳者亦不在多  
也吾聞先生之詩其有關名節者多以被焚不存則今所  
存亦非其至者有此數十首之文沙汰雖嚴芒角愈出卽  
謂有光于詩焉可矣

張斌橋庵

寧波一小民張斌住崔尚書廊業織蒲鞋性好念佛夜以蒲  
鞋剪下草鬚念佛一數珠卽記一莖裝竹篾中每歲除夕焚  
地藏殿寶庫內已幾十年矣適崔尚書患發背死至冥府冥

君怒目數其平日過惡崔公曰能縱我回陽一修福業以贖罪乎冥君曰汝所蓄皆作業錢此間用不着汝租屋民張斌至心念佛積有金錢幾倉在此能易一萬來罪可解矣遂放崔回立呼張斌告以故張斌曰此誠有之乃令書券以實銀一萬易之請僧焚券回向崔疾漸愈張斌乃以其銀造一大橋費幾千金復建一菴接衆至今號張斌橋菴余昔館錢希聲州侯署中希翁兄弟數爲余言此事丁丑余叅天童密老人亦曾過此橋蓋確實非謬者

靈隱晦山樵戒顯現果隨錄

嘉慶庚辰年史君春亭創議捐募於菴後建樓五楹中奉文昌帝君左右祀本宗果齋先生先儒程畏齋積齋二夫子史氏本舊家春亭係中奉獨善先生之後祖儒士在挺娶陳孺

四明談助

卷三

十一

人未娶時病經歲不愈母家意遲疑孺人立志過門侍疾未幾在挺亡翁姑詢其志曰有先代冀國夫人遺訓在當效法之時從叔少宗伯慎齋公歸里聞其言揖而謝焉孺人含苦茹辛撫所後男節昂成立卽春亭之父也居近二程夫子舊宅二程係果齋門下嘗講學於宋守胡榘太白樓中遺蹟久湮孺人諄諄以修復誠其所後男而所後男亦以遺訓傳其子今春亭之興復舊蹟請鄉先達題曰古太白樓承先志也陳孺人節孝事已於乾隆三十五年題請旌表載志乘節昂號斌野國學生著有野吟集詩稿

木蓮藤下史氏

木蓮藤下在張斌橋北之東與史狀元府隔一界河聞志於



狀元府亦渾稱木蓮藤下以史氏舊居出名也史氏初居城中湖上族望表并列傳俱載湖上第後有居於江東者有居於東湖者有居於東吳者分見各第下

### 史中奉彌鞏

字南叔彌遠從弟也好學強記入太學升上舍時彌遠柄國寄理不獲試淹抑十載嘉定十年始登進士第嘉熙元年都城火應詔上書謂天倫之變世孰無之洪咨夔所以蒙陛下殊知者謂霄川之變非濟邸之本心濟邸之死非陛下之本心其言深契聖心耳以先帝之子陛下之兄乃使不能安其體魄於地下豈不干和氣召災異乎出提點江東刑獄饒州兵籍溢數請汰之令下營門大譁呼諸校

### 四明談助

### 卷三

十一

謂曰汰不當許自陳敢譁者斬咸叩頭請罪諸營帖然廩給亦大省召爲司封郎以兄子嵩之入相引嫌丐祠遂以直華文閣提舉崇禧觀里居絕口不道時事自號獨善卒年八十子肯之能之有之胃之皆進士

詳宋史本傳

### 史果齋先生蒙卿

字景正獨善先生孫也年十二入國子學通周易春秋兼善詞賦祭酒江萬里甚器之咸淳元年成進士授景陵主簿歷江陰平江教授入元遂不復仕自號靜清處士初其父肯之提刑湖北果齋往省遂從學於巴川小楊先生岳岳與大楊先生枋師常德晏先生淵淵師考亭朱子因得聞朱子之傳晚年設教於鄉程敬叔兄弟皆稟學焉其著

書立言一以朱子爲法人稱之曰果齋先生先是淳熙四君子俱接象山陸氏之傳四明後學皆以陸氏爲宗自黃文潔力崇考亭之訓而果齋又能遠接其緒以啓迪後進由是朱子之學盛行于四明焉曹志弟唐卿與兄蒙卿同中咸淳元年進士果堂耆舊傳弟芳卿博學著書仕至司戶參軍元人改授不赴其時尚有世卿損之子也亦不仕元皆當附之蒙卿之後者鮑琦亭集

獨善坊

在縣東三里史中奉彌鞏自號獨善鄉人即名其坊嘉靖志句餘土音史中奉獨善堂

一門五宰執史氏稱極盛誰居東江東翻以隱約勝寒瓊

四明談助

卷三

四十年嬾致宗袞敬高門徧行馬吾自閉蒿逕清流交口推謂足嗣八行我考諸史中尚自多佳令光光忠宣公辭相苦口諍晚臥萬金湖麾手謝遺贈忠宣臥家十六年更兄所遺贈皆不受更有和旨翁再世辭恩命和旨名渭子彌林事見剡源集甚而自樂翁憂患長相迸自樂名彌應見陳侍郎寶菴集亦粵十二郎碧沚師傳正有事弗令知衛社謂爾遠所深病不以歲寒凋偏藉疾風動三傳爲環卿以死殉莊靖獨善不終獨行葦連枝映六賢校五公誰足延餘慶宋史登其二遺文疎考証至今空堂下寒泉輝藻苻

甬東靜清書院

節錄鮑琦亭集記

有元儒林世系魯齋白雲專主朱學靜修頗祖康節草廬

兼主文安其足以輔翼二許者吾鄉程敬叔兄弟最醇魯齋得之江漢趙氏白雲得之仁山而敬叔兄弟得之靜清史先生先是吾鄉楊袁之徒極盛史氏之賢哲如忠宣公文靖公獨善先生和旨先生鴻禧君饒州君皆楊袁門下傑然者也靜清爲獨善孫始由巴陵楊氏以溯朱學當時隻輪孤翼莫之應和而黃提刑東發出焉遂稍稍盛朱學之行于吾鄉也自靜清始其功大矣江漢仁山皆已俎豆澤宮而靜清莫有擷溪毛以問之者後死之于斯文能無媿色乃卽甬東書院故址特建靜清栗主而以敬叔兄弟附焉其再傳之徒如蔣敬之樂仲本鄭以道輩亦附焉吾讀清容所作靜清墓志其于易代大節言之已悉而學統

所在不甚了了然清容言靜清嘗與深寧說經每好奇以是多與深寧不合則又可知靜清雖宗朱學而其獨探微言正非墨守集傳章句或問諸書以爲苟同者正如東發亦宗朱學而于先後天圖說攻之甚力蓋必如是而始爲碩儒不善學者但據一先生之言窮老盡氣不敢少異而未嘗顧其心之安否是爲有信而無疑學問之道未之有也至清容以爲好奇是不知靜清者也甬東獨善坊之有書院始于鄭相國安晚以祀其師迂齋樓公且行鄉飲酒禮焉其後爲栖心寺僧并其址敬叔之父靖齋乃移之史氏所居之旁而上祀先聖焉詳見郭嘉所爲記先聖之像明時已移入學宮故主是院者莫如靜清而于後堂仍祀

迂齋以無忘安晚尊師之舊也

綵戲橋

宋史彌鞏故宅西彌鞏乞祠歸為娛親行樂之所故名止敬  
錄此橋今已無攷

史縣尉彌應

字定叔文惠從子釋褐寧海縣尉罷歸不出著自樂山吟

湖語注

陳習菴序云余外家赫奕寵榮蟬鼎相望獨舅氏自樂翁常懼讒退處閉門求志凡八年行吟空山中有詩數卷暇日蒐百篇示余根騷脉唐律嚴思苦殊有幽閒古淡之態舅氏沒且葬其子一之取而刊之索引於余余曰使吾舅

四明談助

卷三

五

順適於富貴則有抱塵附焰以死耳豈復操此奇趣乃今不以俗目歆羨者為悅顧清凝搜討以自樂其非能樂吾本然之樂乎然則困抑沉滯不與富貴並馳固吾舅之屈孰知超世絕塵高鳴以自壽富貴者泚焉實吾舅之伸也

錢志藝文

史春坊彌寧

號友林學蕭東夫詩湖語注著友林詩稿二卷今所傳惟乙

稿一卷四庫全書簡明目錄謂其論詩以妙悟為宗故有詩家活法類禪機之語其詩乃務為新巧或傷纖仄然一

花一艸時亦點綴映媚錢志藝文

史處士公珽

字搢叟通諸經子史延祐間詔郡守舉行堂試屢占前列  
同里鄭習齋夫奕以道學文章自任凡有論撰必俟搢叟鑒  
定然後出稿因妻以女家居教授生徒務底于成程時叔  
薦于甬東書院主奉卽棄去遊西州陶寫性情論宋季臺  
閣故事臺臺終日及忠臣義士殉節者必慷慨流涕廣平  
李堯民七喪不舉德祐遺民湯叟老而貧咸竭力周之自  
號蓬廬處士子景祖字行可仕至山西憲副晟祖字名可  
文詞華贍以明經薦授鳳陽郡訓導聞志

### 史氏宗祠

史氏本居月湖至八行詔始居大涵山後子孫貴復遷月湖  
木蓮藤下之居晚宋時所分也合鄉城言之宋時一門進士

### 四明談助

#### 卷三

六

二十八人元時甲第無聞明時據薛千仞鄞獻表進士三人  
舉人四人今錄于宗祠下 本朝兩侍郎別有傳

史谷聲

洪武丁卯舉人

史均勤

永樂乙酉舉人同知

史敏

正統乙丑進士參議

史立誠

正德辛未進士刑部郎中

史元中

嘉靖辛卯舉人知縣

史元功

嘉靖丙午舉人

知縣

史起欽

萬歷己丑進士知府

知縣史公元中

號鹿泉家貧少牧牛田間喜讀書長益慕任俠善射酒酣  
橫長稍賦詩人皆以爲狂或勸之曰以子之才但稍治經  
生業得由甲乙科起家異日立功萬里未晚也公乃出應  
諸生試嘉靖辛卯舉于鄉知魚臺縣魚臺故瘠瀕河歲祲  
多盜有簡瑞者爲盜魁善運稍馳馬出沒官道公以計縛

之簡臥庭下瞠目曰吾左手持稍右短兵橫行千里間今  
爲書生掩取天也公笑曰汝輕書生耶卽起著短衣持其  
所用稍運之左右迴旋如舞匹練忽稍斷爲三擲示簡曰  
汝稍豈足用耶簡叩頭請死罪乃繫之獄至冬月將論決  
簡求見公曰身亦山東男子不敢負公乞假十日一生別  
老母公卽縱之去衆皆懼及期先一日簡就獄離魚臺三  
十里爲獨山大盜劉儀嘯聚其中有衆數千開府曾公銑  
議進勦以公爲前鋒旣擗日陳兵禱祭畢公知獨山有謀  
者在軍乃令植一竿百步外公手挾矢誓曰若一舉滅賊  
當三矢中此竿時萬目齊注監司諸將皆色變公從容三  
發三中呼噪震地是日公卽察得謀者三人釋其縛賜以

四明談助

卷三

七

酒食笑謂曰汝來觀吾射耶謀者股栗盡吐賊虛實及所  
入獨山徑道立提兵襲其寨擒劉儀還曾公大喜方論薦  
公而曾公遷制三邊奏復河套尋爲相嵩所害赴市公唱  
然曰事尚可爲耶卽日掛冠歸里時年四十二家居復四  
十年性喜奇山水每極遊竟月忘返老益貧惟賣文以自  
給所著青蓮集三十卷間已失惟余家藏公詩一卷適史  
氏修家乘就余家寫之耆舊傳

史寧國起欽

字德明萬歷十七年進士知寧國府續耆舊傳子榮號雪汀遷  
于月湖竹嶼傳見竹嶼下

錢氏祖墓

芍庭錢氏墓在張斌橋右爲東來脉盡結與李氏森森亭齊  
名其來龍枝爪帶結有一都戎氏墓有金鈎釣月丁氏墓有  
孔夫堂包氏墓有爬江鱉胡氏墓皆鄞邑望族

### 木蓮藤下分水

東合西洞橋來水過塘河南行經柳隘自南轉西出廟堰磳  
西合張斌橋來水南行由四眼磳橋轉西落大石磳

### 櫟木廟

縣東四里祀宋鄞令張珣後遷甬江之東相傳神有功翦馬  
今各營于中秋日設祭曹志珣爲鄞令卽治廣德湖一事南豐  
爲作記其有功德于鄞亦概可見故報以廟食至以神爲有  
功翦馬或謂張侯曾手植櫟樹于城東則相傳之說也錢志

### 四明談助

### 卷三

六

### 李杲堂鄮東竹枝詞

賀丞社火鬧江干湯令公祠奏樂闌惟有中秋逢馬市一人

騎馬萬人看

江東櫟木廟每遇  
中秋爲馬市甚盛

### 洪氏東皋草廬

明政和縣知縣洪稼翁貫退老之居

洪稼翁先生貫字唯卿父處士性宿擅文章有重名先生少  
從父受易成化十三年舉于鄉歷仕政和知縣政和有紫  
陽西山遺跡先生爲發揮以經學風勵一時俱彬彬起晚  
歲結廬東皋自號稼翁日歌嘯其中年至九十尚不忘摘  
翰單章尺牘流傳江左有周易解疑臥遊清歎錄太白山

人稿五十餘卷

詳耆  
舊傳

附稼翁詩一首

送白齋張廷評還南省

早從研席接輝光晚讓青雲道路長故里衣冠重對酒異鄉燈火昔聯牀官居執法星辰近詩變元和骨性強老我雙眸還似舊時看天路有翱翔

洪明府第

周孟橋下 本朝程鄉縣知縣洪圖光之居匾額尚在

洪贈公奎明

字星聚九歲而孤兄亦繼歿奉母篤孝事寡嫂如其母性嗜學雖屢試不合攻苦未嘗少衰愛吟陶靖節田園諸詩課子之餘必手一卷坐對平疇得遠風懷新真樂尤耽山

四明談助

卷三

九

水之勝所至恒數日不返及子發甲貽書諄誠其宰邑牧民之道遂成循吏向時有隙者至是毫弗介意且更周其乏即古人有所不及

聞志

洪程鄉圖光

字暉吉一字梅槎順治戊戌進士知程鄉縣程鄉少與史侍郎立菴齊名而立菴嚴事之其才誕放不羈吾鄉東西城皆有樂戶其婦多奔走諸大家為媒氏程鄉見有首面者雖通途中亦呼而狎之時人比之屠長卿顧厄于科名及其作令時粵中尚未靖程鄉折節撫循疲民大有經畧乃知其非徒誕放者流也而以詿誤去官立菴為言于

朝得 召命然卒不見用以卒有師儉堂集

續音傳



暉吉子甲午膺鄉薦適有悼亡之戚同里富人包顯之有一女欲招暉吉入贅暉吉用錢如泥沙不數年而包氏之貲盡矣其爲程鄉令也民困不可勝計粵中向例凡有正項錢糧一兩卽有均平三四錢均平者火耗之別名也有遊客至縣所費惟出方寸一紙里下立辦凡遺人皆論長夫名數每名十二兩惟令君之意時徐健菴往候兩廣制府吳伯成道過程鄉偶拜之暉吉臨行致贐健菴近視取帖視之見寫長夫四名意謂可得四十八兩及暉吉去而諦視其帖則長夫四十名計餽銀五百兩健菴大出意外暉吉在程鄉一年以逃犯不獲革職歸歸而晚年困甚遂北走京師欲有所求復困而歸歸次淮上一病不起卒于

四明談助

卷三

二十

舟中一少子侍側卽包氏所生途中狎妓毒發爛去其鼻遂成廢人或以爲涼德之報也徐子文書暉吉事

賣蓆橋屠氏

屠氏宋南渡時由汴遷常之無錫理宗朝邦彥公季復自無錫遷于甬江桃花渡北爲鄞之始祖至三世祖隱真生子四長次俱遠徙三仍居江北四居江東賣蓆橋進士養浩之父也今別爲一支屠莘農先世見聞錄

屠養浩洪武四年辛亥科進士官永寧縣丞見選舉表一云官同知見薛千仞鄞獻表屠氏宗譜同

賣蓆橋施氏

施文學江濤字來青家世以詩學傳大父兆麟有澹園集北

遊草父鏗有詹詹集文學少奇慧弱冠補諸生一病幾絕  
父憂之文學愈而父卒遂抱痛終其身不一赴塲屋性介  
不妄取予妻子冬月猶衣紵衣獨喜爲詩有蓬廬集四卷  
小樂府最工兄淞濤有飲香亭集滄濤字東峽乾隆七年  
進士紹興府學教授有石雲樓詩集錢志子于木字厚亭邑  
廩生詩賦敏贍以賣文自給今所行勾江詩緒厚亭曾祖  
父三代詩也板猶藏于家

### 李氏封塋

在櫟木廟前李氏自始祖茂六公以下四世葬于是青烏家  
稱爲名墓科名德業至今不替

侍御公

循義

題森森亭詩

并序

### 四明談助

#### 卷三

三

先人遺墓在城東二里至大父櫟軒先生附葬四世古柏  
鬱然墓旁丙舍題曰森森亭其柱聯曰匝地虬龍盤墓道  
百年豺獺在人心爲續成一詩

草亭郭外鬱森森華表遙瞻四世深匝地虬龍盤墓道百年  
豺獺在人心階前自映蒼苔色葉底頻傳好鳥音却憶沛中  
提劍日太平祖臘到于今

墓爲吳元年造

### 李家橋

元至正間李茂祿建卒葬此其七世孫循訥建森森亭

敬止錄

### 芴庭錢氏

在櫟木廟後亦稱潛龍漕錢氏謝山謂其脉自慈谿驃騎山  
來此言誤

甬上族望表城東芍藥泚錢氏自宣城來侍郎管廣西布政事免廣東按察副使瓚知臨江府若賡山東提學參議啓忠知寧國敬忠殉難大學士諡忠介肅樂殉難翰林院檢討肅範兄弟徵士光繡監察御史肅圖共九望

錢氏家乘序

節

杲堂文鈔

天下一治一亂相循環而所謂世家右族其盛衰亦從之至若歷數所遭禍纏君國三百年間前莫大于壬午遜國之變後莫大于甲申殉國之變而錢氏守臣節能與相終始斯誠所謂世家者矣按錢氏始祖安字靜能晚號畦東先生洪武中以徵辟歷官韓府紀善乃文皇帝卽位召至京師先生固以疾辭得放還夫文皇帝初靖難方以刀鑕鼎鑊處士大夫

四明談助

卷三

三

不屈者先生諸藩舊臣義堪去就而能從容乞身不撓不抗至其後甲申禍極乙酉繼之天下事已不復可爲時忠介公肅樂以閒曹諸郎出當大難蓋錢氏臣節其係于至大者若此雖三百年間後賢接起若布政公奐之討賊副使公瓚之吏治宛陵公敬忠之至孝督學公啓忠之論學其餘以文行著名甲乙科者歷歷可數然皆畦東先生作之于前忠介公述之于後足輝映古今非僅錢氏一門亦國史之光華也  
紀善錢公安

字靜能洪武十七年舉文學選韓府紀善王禮遇甚厚其

子洵有才望王召見之書具慶堂三字以賜尋致仕

聞永志

樂改元聞公名召至京師將大用之公義有不可固以老

辭得放還且賜勅曰遂爾優游勸鄉子弟爲善亦異數也  
公既家居日以觴咏爲事所著有畦東集老卒於家晉書傳  
李杲堂竹枝詞記其事曰乞身歸去老江臯具慶堂前試  
濁醪全節盡推錢紀善百年門第至今高

### 布政錢公奐

字文煥紀善安之孫也舉正統元年進士授戶科給事中  
陞廣西叅政時義寧賊起衆議轉餉公請給兵以銀因糧  
于敵兵民稱便潯州老藍寇起以單騎諭平之土官岑豹  
羅文愈以爭地訟公宣布威德皆帖服焉尋陞湖廣左布  
政使丁內艱去服闋補廣西民相慶曰不圖復見錢參政  
也力請致仕以高年終嘉靖志著有訥菴詩艸

### 四明談助

### 卷三

三

### 按察副使錢公瓚

字廷佑方伯奐之子宏治十二年進士知潛山青陽二縣  
皆有惠政歷官廣西副使嘗行部至梧夜夢婦人蔴衣持  
牒而哭厥明鞫囚有王姓者爲兄毆殺而其妻刁氏具牒  
以姪毆爲詞公按牘兄年六十而弟方四十疑衰老不能  
斃強壯此必姪毆之呼刁質之而刁已死矣因悟夢中婦  
乃刁也一詰卽服衆稱神明已而告歸囊無長物王陽明  
手書一道清風四字以贈閉戶不出自號括菴嘉靖志長子  
崑嘉靖壬午舉人知信豐縣多善政庶子嶧嘉靖甲辰進  
士徐州兵備副使治尚嚴明下不敢犯曹志

### 知臨江府錢公若賡

字颺虞布政奐之曾孫隆慶辛未進士官臨江知府從弟  
若任萬歷丁酉舉人聞志布政連傳萬歷中錢公若賡守臨江多

異政有鄉人持鷺入市寄店中他往還索鷺店主賴之曰  
羣鷺我鷺耳鄉人訟于郡公令人取店中鷺計四隻各以  
一紙給筆硯分四處令其供狀人無不驚訝已退食問鷺  
供狀否答曰未少頃出下堂視之曰狀已供矣因指一鷺  
曰此鄉人鷺蓋鄉人鷺食野草糞色青店鷺食穀粟糞色  
黃也店主服罪白驛瑣言臨江繫獄事見後寧國傳

錢孝廉靖忠

字心訥一字獻孟父臨江守若賡坐事下江右獄公與弟  
益忠敬忠抱痛力學萬歷戊午與弟敬忠同登賢書天啓

四明談助

卷三

三

初敬忠赴闕計父寃公與益忠往江右哀懇其鄉大僚劉  
焜鄒元標諸公多方救援遂得釋公以父年老須養不赴  
公車爲人嚴毅侃直鄉人莫不敬憚之子肅哲有聲庠序  
肅凱順治戊戌進士官江寧司理聞志

錢訓導益忠

字謙仲一字又樛忠介公肅樂之父以明經訓瑞安江上  
贈副都御史其訓瑞安有遺愛士子爲立祠祀之故忠介  
之難諸弟肅祺避兵其地

寧國知府錢公敬忠

字孝直一字玉塵曾祖江西信豐知縣崑祖封禮部主事  
鳳午父臨江知府若賡臨江初任禮部以選妃事忤神宗

意及爲臨江知府會勘故御史劉臺爲江陵所陷狀據實無所阿徇江西故撫臣坐是遣戍諸貴人之欲庇江撫者皆怒乃以其嚴刑捕盜賊目爲酷吏峻其語上聞神宗以前憾必欲殺之三法司及臺省屢爭不能得閣臣申文定公時行知其非辜乃議緩決繫獄三十七年終不得出臨江三子靖忠益忠敬忠皆受經獄中抱痛力學每值恩赦卽匍匐乞哀當事以獄詞重迄不獲援例萬歷四十六年長公靖忠少公敬忠皆舉于鄉明年少公中進士將拜疏大臣謂上怒未解懼速之死乃不赴廷試作誓墓文以必死自期熹宗嗣位公詣闕歷陳得罪本末未得旨令部臣集議遷延未上復奏臣父年八十倘不獲宥願賜臣一死

四明談助

卷三

五

釋父出獄通政司格之不得上公更節錄前二奏囚服跪午門祈閣部諸臣爲之轉請時江西人官京師者徐彥良姜曰廣輩亦出公揭而鄒公元標方起掌刑部乃促令法司議之議上得旨准將錢若賡免死放還鄉里公自京赴江西奉父歸浙兄靖忠以父老不赴公車授經于鄉痛父罹禍布衣蔬食終其身益忠以貢生爲瑞安訓導造士有方邑人立祠祀之公之伏闕也又作誓天文要以必死卒遂其志乃以天啓壬戌補廷試授刑部主事中官方熾林居不出其成進士出涿州馮銓門時馮方昵璫柄用不一與通崇禎時御史沈希韶奏敬忠泣血長安道上三年而出父子死馮銓炙手可熱敬忠視之若浼宜加殊擢詔以

原官起用後出守寧國府罷歸宏光時三上疏南京極論時事不報乃歸硤右之寓亭自稱崇禎遺臣臥病不出次年公病已亟聞大兵已渡江遂勿藥以六月望後一日卒所著有偶存集子光繡昭繡並能詩光繡尤有名鮎崎亭集墓表公救父上熹宗疏并上宏光論時事疏具載表中女雲繡字文孫適梁溪浦氏亦能詩見續耆舊傳公上北都二疏南都三疏別爲一卷臬堂爲序

提學錢清溪先生啓忠

字沃心號清溪錢氏爲鄞望族方伯奐而下五世爲若賡若選若賡守臨江生三子靖忠舉人益忠訓導敬忠知寧國府益忠之子肅樂卽忠介若選諸生以父病探藕池中

四明談助

卷三

三

終身孿疾里以孝稱生二子長爲先生次孚忠先生天啓初舉于鄉遂執經鄒忠介之門毅然以名教自持崇禎戊辰成進士時承逆奄之後天下書院皆經拆毀先生上言臣觀崔魏亂政奄祠徧于天下乾兒義子人頭畜鳴斯孔孟學術一大厄也三尺童子猶知笑之而中朝誦功勸進轉相效尤者正以諸臣理學不明不識節義爲何物但知有身家不知有君父但知迎合流俗不知反照良心良心泯而道術晦道術晦而治術墮矣是故生祠書院相爲勝負者也應將已毀書院盡行修復此聖政之急務也疏出廷臣皆矐之丁憂服闋轉禮部員外郎山左兵荒餓殍載道疏請留漕糧十萬石賑之全活者無筭辛巳提督山東

學政至李家莊流寇猝至先生諭之皆放兵羅拜則先生  
昔日所活之饑民也以誑誤歸未幾得白卒于家子三人  
在者惟廉能守家學孫女適諸生萬經南雷文定墓誌從子肅鏞  
族子肅臨皆克敦文行世其學肅志連傳

### 大學士錢忠節公肅樂

字虞孫又字希聲學者稱爲止亭先生瑞安訓導益忠第  
三子也祖臨江知府若賡字颺虞萬歷直臣以忤江陵囚  
獄中幾死公年九歲寄呈所作文于獄中臨江喜曰颺虞  
翁有孫矣故字曰虞孫登崇禎丁丑進士釋褐知太倉州  
事吳中素難治豪家奴與黠吏爲奸而凶徒結黨殺人焚  
其屍公痛懲皆斂手又以墨白榜列善惡人名械白榜者

### 四明談助

### 卷三

七

階下予大杖久之杖者曰少嘗攝崑山崇明二縣民皆立  
碑頌德遷刑部員外郎尋丁內外艱順治二年 大兵取  
杭州屬郡多迎降時公方居憂聞信慟哭絕粒閏六月寧  
波鄉官議納款董公志寧聚諸生謀起義時姚之故九江  
道僉事孫公嘉績故吏科都給事中熊公汝霖已起兵公  
于是夜輿疾至城東觀變諸生聞公至大喜挽公入城遂  
定謀以十二日集紳士于城隍廟諸鄉老相繼集前迎降  
同知朱之葵通判孔聞語亦馳至諸人皆未有定意離席  
迎此二人而公遽碎其刺拂衣而起百姓聚觀者數千人  
譴聲動地有戴爾惠者布衣也大呼曰爾輩何不竟奉錢  
公起事觀者齊聲應之舉手互相招擁公入巡按署中俄



頃海防道二營兵暨城守兵皆不戒而至遂以墨縑視師之葵乞哀于百姓百姓爲之請乃釋斬聞語以殉定海總兵王之仁已納款得貝勒令仍舊任鄞之故太僕謝三賓家富耦國方西行見貝勒歸欲害公所爲乃貽書王之仁謂諭諭訛訛出自庸妄六狂生而一稚紳和之將軍以所部來斬此七人事卽定矣某當以千金爲壽公時年未四十故有稚紳之誚會公亦遣客倪懋熹以書告之仁勸其來歸之仁兩答書約以十五日至鄞而密語懋熹令具燕犒三賓不知也方以爲殺公在旦夕屆期之仁至城東諸鄉老大會于演武場坐定之仁出三賓書對衆朗誦三賓遽起欲奪其書之仁變色因問公曰是當殺以祭纛否語

四明談助

卷三

三

未畢長刀夾三賓而下三賓哀號跪階下請輸十萬金以充餉乃釋之于是沈公宸荃馮公元颺亦起于慈自鄞慈合兵聲勢響應之仁旣以關內兵至而關外黃斌卿以翁州兵至張名振亦以石浦兵至慈奉象定知縣偕新知鄞縣袁州佐皆以兵餉來會郡中監司守令皆逃乃以通判羅夢章行守事而太常莊公元辰助登陴焉聞魯王在台州公以是月十八日遣舉人張煌言奉箋請監國會紹興餘姚亦起兵乃赴紹興行監國事七月十一日會師西興王途中加公太僕寺少卿旣至再加右僉都御史分汎瓜瀝公四疏辭新命請以原銜署事力言爵賞宜慎不可蹈赧王故轍濫予名器并辭諸弟姪從軍之受爵者十月樞

輔張公國維約諸軍以初八日始連戰十日公與諸軍斬戮皆有功而第七戰尤捷是役也前鋒鍾鼎新用火攻首擊殺緋衣大將一諸將呂宗忠等各斬數十級俞國榮等直抵張灣取其器械以歸時浙西諸府州並起義兵蘓松嘉湖列營數百而浙東又建國杭州孤懸危甚以兵急攻平湖平湖之主兵者爲屠翰林象美書生不曉軍事公請以兵由海道急援之不聽說者謂監國初起江上適有浙西首尾相應之勢若用公言則大兵進退兩顧杭州不能復守可逕渡三吳以窺白下而坐失此會此足以見聖朝之得天命也未幾而分地分餉之議起故總兵方國安自浙西來軍最盛之仁次之號爲正兵諸義兵倚毗焉

于是議取浙東之正餉以予正兵而義兵取給于富室之義餉未幾正兵并取義餉而義兵遂無所取給餉臣不能應公屢疏入告王不能詰但以閣臣張國維叙公十撓功再加右副都御史公上疏力辭又言臣近者十道並舉冀杭城可復而臣終不能絕流而渡臣今不能入杭誓不再受一官王不許而閩中頒詔之議又起時唐王卽位閩中以詔來張公國維熊公汝霖以唐魯皆係宗藩今日之事成敗者帝若一稱臣于唐恐諸將聽命于閩則王之號令不行因議却之朱公大典與公議以大敵在前而同姓先爭豈能成中興之業卽權宜稱皇太姪以報命未爲不可若我師渡浙江向金陵大號非閩人所能奪也于是議大

不合而方王諸帥忌朱與公遂謂公不受副都之命爲懷  
二心于閩公不得已鬱鬱受官而餉仍不至王以內臣客  
鳳儀李國輔兼制軍餉公力言中官不可任外事于是諸  
藩既惡公而內臣又從中梗之公兵至四十日無餉然感  
激公忠義相依不散至行乞于道卒無叛者于是公連疏  
乞餉力言軍費之當均王是公言而無若方王何公疏言  
國有十亡而無一存民有十死而無一生皆切中時病語洋

神道第  
二碑

時戚畹張國俊外仗方王內與客李二奄比而馬

阮在方軍遙相呼應見公疏皆恨甚國俊遂飽兼金引謝  
三寶以禮部尚書直東閣相與共擠公王加公兵部右侍  
郎力辭不受而諸帥之謗不止于是公以無餉與孫公嘉

四明談助

卷三

三

績連名請以兵歸開遠伯吳凱不許尋以諜言 王師將  
自海道來乃移公守瀝海公既至終無所得餉疏言臣兵  
不得不散但臣以舉義而來大仇未復願率家丁數人從  
軍自効王溫旨慰留而諸將蜚語以爲公將棄軍逃入閩  
先是閩之頒詔也并賜創義諸臣勅命公嘗奉表稱謝遂  
爲諸帥口實且有令壯士劫取公首者公于是棄軍拜表  
請行言臣今披髮入山永與世辭遂至溫州避人王得疏  
大駭知公不可留乃降旨令往海上同藩臣黃斌卿鎮臣  
張名振取道崇明以復三吳時方有由舟山窺吳之計也  
斌卿以舟迎公入翁洲是爲丙戌之五月不三旬而江上  
破公之解兵也閩中有使召之公以江上之嫌不赴及江

上破公由海道入閩請急提兵出關不可退入廣東并陳越中十弊以爲戒閩中優詔答之未幾而閩中又破公避難于福清展轉文石海壇之間與諸弟無所得米則食麥無所得麥則食薯嘗夜涉絕谷足盡裂乃祝髮以免物色已而聞鄭彩扈監國至鷺門來往諸島間禡牙舉事丁亥六月王至琅江公入覲王大喜時文臣在王側者祇熊公汝霖馬公思理而孫公嘉績之子延齡年尚少彩推馬公熊公直閣而已署兵部公至以公自代公泣陳無功請以侍郎署部事不許公疏言馭將進兵諸大計王以爲然于是兵威頓振連下清化福清連江長樂羅源三十餘城侍郎林汝荔都御史林塗皆起兵郭三才以大兵援閩亦

來降遂圍福州而浙東山寨亦各起兵遙應前此六狂生家居者謀取寧紹諸府與公兵爲犄角之勢復爲三賓所告而死公又薦故太僕寺卿劉沂春糧道吳鍾巒特勅召用而閩中遺臣無不出又因福州之敗請卹宗臣統鑾等諸將葉儀等以鼓忠義王是之王之初至閩也鄭成功待以寄公之禮而不稱臣仍稱隆武三年蓋修浙中頒詔之怨也至是公頒明年戊子監國三年歷海上遂有二朔然公嘗有書與成功獎其忠義勉其恢復故成功不以爲忤于是王大媿歎始知公前此江上之議出于平心非二于閩嘗謂公曰先生所上奏疏予皆貯藏之燈下時時覽焉明年王次閩公請立史官紀事晉公東閣大學士疏辭不

許鄭彩之下諸城也自以八閩可指顧定是時諸將稱大營者六自彩而下平夷侯周鶴芝同安伯楊耿閩安伯周瑞義興侯鄭遵謙蕩胡伯阮進定遠伯鄭聯兵力亦無大相過皆惡鄭之專顧彩益橫及害閣臣熊汝霖義興侯鄭遵謙二公而逆節大著故公力辭相位既不得請每日繫舟于駕舟之次票擬章奏卽于其中接見賓客票擬封進卽牽船別去匡坐讀書其所票擬亦不過上疏乞官部覆細小之事大者則鄭彩主之雖王亦不得而問也時唐王雖歿而其將涂登華爲守福寧王遣督相劉中藻攻之登華欲降疑未決曰豈有海上天子舟中國公公貽之書謂將軍獨不聞南宋之末二帝並在舟中乎而况不爲宋末

者乎登華乃降彩欲使其私人守之劉公不可彩掠其地公與劉公書不直彩而書爲彩所得公憂憤交至連江失守公聞之以頭觸枕祈死血疾大動遂絕食六月初五日卒于琅江遺言以故員外郎章服入殮訃聞王震悼親爲文祭之贈太保吏部尚書諡忠介蔭一子尚寶司丞兆恭後六年故相葉文忠公向高之孫進晟謀爲葬之海寧故職方姚翼明時披緇海上尤力助之乃乞地於黃蘗山僧隆琦而修塹道焉公子兆恭卒於翁州無嗣嗚呼公之在江上也厄於方王公去不旋踵而列戍崩潰方王同歸於盡公之在海上也厄於鄭氏公死海上未卒哭而閩土盡失鄭彩亦見摧于延平以死則甚矣妄庸人之害國以自

害也雖然浙東列郡並起事事敗之後獨吾鄉山寨海槎  
相尋不息諸義士甘湛族之禍敢于逆天而弗顧卒延翁  
州之祚至辛卯而始斬則公之感人者深矣所著有正氣  
堂集越中集南征集亂後不完今僅存十之五編次爲二  
十卷公死幾三十年仲弟肅圖始舉子曰濟恭以爲公後  
節錄鮑埼亭  
集神道碑 乾隆四十一年 賜諡忠節  
勾餘土音咏錢太保事

穉紳行

詩話忠介公方起兵時年三十六里中降紳惡之貽書  
定帥呼忠介爲穉紳令以兵除之定帥不用其言反與  
公合

四明談助

卷三

三

神龍南下麾雕戈老奸稽首朝江沱穉紳乃思挽天河妄

以一綫支太阿老奸拍手喚奈何急輸兼金賄降帥

定海  
總兵

王之定能加刃靖海波 聖朝多方正未靖策勳我輩必

殊科庶幾方駕莫儔范瓊不足多那知穉紳雖逆天亦復

惠僥天幸得無他降帥翻然來受命願取老奸釁鼓未爲

苛長刀夾耳反背接哀鳴階下如蟲螺三軍譟聲沸九鼎

晉口笑口交譙呵穉紳今日竟如何如何反自罹于羅此

事差足強人意可惜其時當斷不斷失媿媿曷若竟食其

肉灰其髀吁嗟會稽之棲燭火耳老奸覆出成宰詬穉紳

乘桴海上死不殺六狂生竟狀五君子 聖朝本自重臣

節豈藉鴟鴞爲驅使老奸畢生眼穿不得沾恩祉空將穢

德享茂齒

太人占 錢太保紀夢

詩話太保嘗夢以手障落日終不能支日竟隨手而隕私以語其婦翁董通判光遠後卒如其言

太人占民其魚彼鬼車挽強弧西掩日紛跳驅隨逝水薄桑榆吁嗟一臂弱思將急景扶前跋更後壺左支復右吾妖夢不可踐神夢不可誣一臂終以折急景終以殂寧知蟣蝨臣此志終勿污挽赤精延赤符竭臣力湔臣辜太人占有是夫魚頭識暫膺圖

題錢忠介公像

宗臣有遺像歷劫存厓畧芳魂箕尾遊寒芒鯨背落已埋

四明談助

卷三

三

黃蘖神重溯鄧林魄大節擬松筠舊社光枌柞吁嗟百鍊剛文謝差相若隻手扶墮天星漢共炳爍胡為慘綠姿令人疑文弱淵龍未見首匣劍未試鏑大勇有如儒此志不可度一旦奮孤忠萬夫羣錯愕縞衣出誓師震雷醒聾聵降臣驚破膽泥首甘面縛異軍蒼頭營五家聯束約謂孫熊章于我讀公封事諄諄苦口藥倘能用其言詎鑄六州錯武人為大君一往多失著謂方國安王之仁及鄭彤熱血空淋漓餘生早

摧路手持魯陽戈夢化遼東鶴琅琦一片土歿猶視矍矍遺言憤鸚梁五品持故爵所以愧貪夫非徒志貶削妻兒

已同盡褰裳歸寥廓我我兩介弟肅範肅典繼死連華萼義依

葉進與姚翼一坏得依托斯人如可贖百身尚嫌薄須眉

故軒軒風度儼綽綽固宜陟降神香火紛湊泊揭來臨小  
軒碩膚懷赤寫座中半契家再拜酌杯杓可憐彼降臣游  
魂犬不嚼

山鞠藭

張驃騎助餉

詩話張驃騎廷綬本錢忠介公將後移鎮天台忠介軍  
乏餉驃騎時時以軍食周之忠介曰勿若田宏正之在  
成德也然驃騎善撫軍卒無患江上失守死之

義軍尚如林義餉已如罄可憐瓜里軍

忠介鎮軍所

直似在陳

病遂教荷戈兒爭擬乞米詠猶感幕府忠刁斗肅軍政爲  
憤彼悍帥木石心腸硬下官乃故將綿力苦不競聊分鞠  
藭餘分潤河魚命幕府戒下官莫作田中令丈夫感義襟

四明談助

卷三

三

死但期得正早辦刀與繩矢茲方寸定

附都督張公傳

張都督廷綬字雲衢鄞人武學生少時喜讀兵法又善挽  
強弓舞大刀兼喜壬遜之術錢忠介公起兵以驍勇署總  
統遣迎魯王子台從之江上時台之起兵者陳公函輝及  
諸營分汎江上而陳公訪于錢公曰麾下將才乎錢公  
曰前日以奉迎來者其人可使也陳公奏授都督僉事統  
所部還鎮台之海門而都督爲錢公舊將兩家皆忠悃無  
嫌忌時時以餘餉餉錢軍陳公聞而彌善之已而閩中大  
將李公唐禧至監國以其宿將使共治軍于台 大兵入  
台唐禧謂都督曰公當俟陳公消息然兵已逼不如偕我



早死徒殺士卒無益也都督曰諾各遣其麾下存袍笏兀坐營門大兵過都督營諭降不屈殺之唐禧亦被殺而都督眷屬之從軍者皆死無一存嗚呼乙酉而後浙東諸公蓋亦厓山三丞相之流如都督者則蘓劉義一輩人物也

鮚埼亭集外編

### 題錢忠介公葬錄詞

錢忠介公之葬也諸義士合力營之其時閩南未盡底定海師尚在島中故豐碑幽誄以及啓攢祭告哀挽之作極盛亡國之大夫所未有也公既葬之數年閩之制府陳經征海道出黃蘗嘗親往祭于墓下是非人心是非之公有脫畧于忌諱者歟予嘗讀故都御史林公蘭菴集載甲午

### 四明談助

### 卷五

五

莊烈帝忽降神于浙所降之家驚問帝從何來則曰吾往臨故大學士錢肅樂之葬其家訝之已而聞公果以是日葬其事頗怪抑或忠臣所感信有之乎初公之卒也同里紀侍御五昌故公弟子江上從公幕丙戌以後隱太白山中鍵戶久矣至是忽失所在閱十旬始歸叩之則會公之葬也吾聞紀侍御之集家藏無恙其會葬之作有足以附之此錄者行當訪而補之

鮚埼亭集

### 瓜里六幕府

乙酉六月東江之役瓜里駐軍者六家曰前大理丞會稽章公正宸曰前給事餘姚熊公汝霖曰前九江僉事餘姚孫公嘉績曰前刑部錢公肅樂曰前御史慈谿沈公宸荃

而前分守寧紹台道金沙於公頗亦豫焉

甬上六狂生

所謂六狂生者董公志寧王公家勤華公夏以戊子謀翻城應翁洲不克家勤夏死之志寧逃入翁洲辛卯城陷死之張公夢錫在山寨庚寅寨破死之陸公宇燦以癸卯謀應海上逮死惟毛公聚奎亦累被逮亡命得免

甬東正氣錄十二公

林丈荔堂高丈隱學輯甬東正氣錄曰陳賓曰曰錢止亭曰華嘿農曰張蒼水曰高元若曰楊元石曰莊頑菴曰王石雁曰董次公曰周囊雲曰萬履安曰王水功其後隱學卒荔堂卽續之以隱學又次之以毛象來焉

四明談助

卷三

三七

嵩明州牧錢公士驕暨孝子美恭

使君字房仲一字道生天啓丁卯舉人以崇禎癸未令滇中之陽宗不半年而北都亡又一年而南都亡滇中亦大亂下邑長吏魂驚魄散無復宦情多棄印綬逃去獨使君撫循疲民不震不動大吏交薦以考最擢嵩明州牧天南道斷故鄉親從遣人間行入滇以勸其歸使君復書曰乙酉之夏江南已無君矣止亭弟尚與孫熊諸公畫江求君而事之丙戌之夏浙東已無君矣止亭尚與諸公航海求君而事之倘爾時吾家居亦當隨諸兄弟後自請効死而况奉先皇之命入滇中雖經喪亂吾君尚在其忍委而去之吾但求畢吾之志而已止亭者大學士忠介公使君族

弟也死之日滇民聚而哭之葬于通海之南山使君先舉三子滇中所攜小妻舉二子長子先卒次子隨行而叔子美恭奉母家居卽所稱孝子者也使君之卒家人未知又八年天南大定孝子日夜號咷告母欲求其父而家無一錢奮足出門適有伶人演院本尋親記者孝子曰是我也乃習之業成每逢市鎮輒唱之哀動行路稍稍得錢則前行錢罄復唱則又得錢聽者訝其度曲之神不知其爲寫心也遂展轉依人得入粵中而一病再病瀕死者數矣及至滇踪跡茫然遇土人之知者始得使君死問及其葬地而眷屬不知流落何所哀哭無措又遇土人之知者得導至其舊僕所居始得展使君墓下并求庶母兄弟而見之

四明談助

卷三

三

乞哀告貸又求爲人記室得傭值凡閱七年始得歸骨孝子字西侯既歸父喪以貧出遊卒於山左之濟寧子懿綱奉棺浮舟南下中夜聞空中告以速行者卽促舟人鼓棹疾發次晨河水大決直抵揚子江口餘舟多遭衝沒時以

爲孝子之報

鮪埼亭集外編

錢螿菴徵君光繡

字聖月號螿菴知寧國府敬忠子也少負異才隨侍其父僑居峽右因盡交浙西諸名士已而隨侍游吳中宛中南中因盡交江左諸名士是時社會方殷四方豪傑俱遊江浙間因盡交天下諸名士先生年甫及冠也而宿老俱重之又雅好釋氏故其講學則師漳浦談禪則師木叔海岸

于方外則叅禮密雲雪嶠蓋其師友之梗概也先生本用世才流賊逼京師上書南樞史公請急引兵勤王以救京師之困而先以飛騎追還漕艘弗齎盜糧史公答以具曉忠懷卽圖進發赧王稱制先生累言於當道深以立馬量江爲憂俄而南都又破從兄忠介公方舉兵江上先生居硤中隔一水耳亦不赴蓋先生雖爲故國抱杞人之憂而逆料時事之難以犯手故置身局外丙戌以後頽然自放其別署曰寒灰道人先生於出處之際最嚴沈宮坊延嘉被薦先生貽之書曰聞之梵語修羅每膳必嘗干種兼珍末後一口化爲青泥玉堂清夢非復昔日兼珍青泥滋味恐所不免吾兄其慎之宮坊故不肯出山得先生書謝爲

四明談助

卷三

三

益友葛學士世振被薦得辭先生踵門以詩賀之招撫嚴我公招先生時忠介家方被籍先生欲紓錢氏家難往見之及欲授以贊畫固辭得免每歲三月十九祭王忠烈父子于天封塔寺九月初七日祭張尚書於城西從兄江寧推官肅凱與先生始睦終疎及其罹刑懼家門不保以幼爲托先生力任之其自硤中返甬上也構莖壘菴闢祇園築歸來閣與里中遺民爲耆社先生平日風流自喜得之性情然感懷家國漸以憔悴遂成心疾竟以憤悶失意自裁著有從慕堂詩文集十六卷忠介之子濬恭藏之

鮑琦亭集

編外

勾餘土音擬薤露詞

化青泥 錢道人留行

詩話沈顯申翰林爲人所薦力辭不獲錢螿菴先生貽以書翰林曰良友也卒不出

修羅日享百千寶膳未足奇末後一口化青泥青泥猶可馬矢辱我

附螿菴告衣巾詩四首

告衣巾詩以徐涇恭謁孝陵首句起韻仍用洪武韻續成之得七律四首情勝乎詞詞云乎哉

二百年來一老生功名唾手竟何成不因屢易慚知遇賴有微吟答聖明白髮未盈嗟髣短青衫纔脫覺身輕瘦驢閒向山中打踏盡松聲并水聲

四明談助

卷三

四

二百年來一老生每將忠孝勵生平狗屠有策干卿相牛僧無長溷姓名南渡祇應歌麥秀燕雲何處酌冬青祖龍詫具鞭山力方寸嶽崎劃不成

二百年來一老生詞壇負弩濫先聲中郎倒屣迎王粲文舉通家謁李膺此日人琴空有慟他年史管更安憑敢辭後死詩文責業在名山非汗青

二百年來一老生也曾作賦也談經空名博得衣巾在血性還疑廟社憑狡兔漫營三窟穩饑鴟巧爲一身營怪人薰灼翻成唾何必邯鄲夢始醒

錢公子昭繡

字觀文一字讓水知寧國府敬忠次子也才名與伯兄光

繡相埒初寧國未出守時嘗流寓宛中樂其風土已而蒞任將卜居焉以硤中安土故不遷丙戌後錢氏之居鄞者以忠介故四散而伯兄居硤亦多故遂挈家住寧國日與沈眉生兄弟唱和此外不通一客親友招之不歸忠介之弟退山以癸丑過宛前此未嘗相識至是抱頭而哭相與各訴家事眉生嘗以先生兄弟與退山稱為錢氏三逸先生生寧國所著有讓水集續者舊傳附林監軍日宣傳并詩

監軍字君言一字蒿菴閩人也嘗仕閩中已丑庚寅之際仕浙中已而仕滇中亂後來鄞嘗預錢螿菴耆舊之會所著有綱目外傳荔堂先生為之序世其有知之者并其官

四明談助

卷五

四十一

職亦莫能考據梨洲先生贈詩有桑海猶然記貼黃之句

其亦臺諫諸員乎

續耆舊傳

錢螿菴舉耆舊社于歸來閣

鐵骨稜錚盡碩儒一樓高會正當期竹林酒裡留天地風雅壇中建鼓旗愧我尋朋年作客共君憂世髯皆絲江帆歸載琳琅重壓倒娥碑絕妙詞

錢侍御肅圖

字肇一一字艾叟學者稱為退山先生忠介公第四弟也以諸生豫忠介幕府授推官時名器冗濫忠介力辭子弟恩命不受已而從亡累官監察御史崎嶇海壇化南之間洊更百死戊子忠介卒於瓊江先生以諸弟入劉公中藥

軍助守福寧已丑圍急出城乞援未返城陷第五弟肅範  
死之先生以忠介子翹恭從亡翁洲庚寅卒於翁洲辛卯  
翁洲又陷先生栖泊山海之間丙申第九弟肅典以赴義  
死時先生第七弟肅遴自江寧之師歸已而亡命吳市亦  
以佯狂死而忠介尚無承祀者其餘諸弟散走四方先生  
歎曰吾不可以輕死乃展轉患難中爲保全宗祀計五十  
九歲始舉一子爲忠介後然先生家被籍無一瓦之覆一  
壠之植不得已始出而索食客淮上入秦中走東粵及河  
督靳公至淮重先生名延之先生忽忽不自得靳公知其  
意爲築舍于外有謀則就之時人重先生之介而亦服靳  
公之賢每從江上歸徘徊四顧歷指當年營汛以示諸子

四明談助

卷三

四十一

失聲痛哭而去先生之詩其自甲辰以前皆不存晚年手

輯忠介遺集及所著東村集遺命其子濬恭藏於家

續傳舊傳

辛卯翁洲之役被俘者不屈同輩已戮盡次及侍御監刑  
者熟視忽釋之非所望也子三長濬恭卽爲忠介後者也  
次澄恭漸恭侍御臨終戒濬恭兄弟曰故國故君之感此  
吾輩所當沒身而已者也若汝輩則不容妄有逆天之念  
存于其中嗚呼世更百年見斯文者猶將爲之涕泗不已  
而况濬恭兄弟乎哉初侍御歸自海上也杭人吳祥農晚  
出欲爲名高移書謂侍御不當出而爲索食之遊侍御以  
良友謝之及農祥應詞科之辟人多笑之侍御曰士之出

處各殊耳其渾厚如此

鮑琦亭集外編

錢檢討肅範

字錫九一字箕仲忠介公第五弟也江上失守諸弟之從軍者皆從忠介浮海爾時監國誥勅文字忠介多以屬之檢討已而忠介請置史官以紀起居馬閣學思理卽薦入館忠介之卒也因閣部劉中藻與鄭彩爭忠介平之而不得彩反以此爲憾忠介憂憤疾動遂絕藥餌而卒諸弟子成服後或之瑞安或往翁洲卽未去者亦避地秦川長水之間忠介命也而檢討獨與仲兄侍御未去或問之答曰止者報國行者全宗不相背也中藻方守福安遣人來迎時大兵盡定閩地僅餘福安寧德二縣指日受師賓從皆勸檢討無往而毅然赴之中藻奏兼兵科未幾侍御亦

四明談助

卷三

四三

出城募兵而長圍四合助城守凡六月累與大兵戰輒勝而援絕道梗大兵乃屯於郭不復附城而專待其糧盡侍御遣人縋城入見檢討復書曰吾兵尚利足以一戰但枵腹枕戈勢烏能久城中望援以刻爲歲吾惟一死待之而已城陷望百辟山歎曰此宋少帝入海處也賦絕命詞投纆兵至被執不屈其僕張貴年僅二十亦從焉嗚呼裏馬革以從兄可謂各遂其志者矣福安之陷也滿城迸散莫能言檢討之死而有焦甲者言檢討死甚悉蓋嘗在圍城中親見者也于是林太常時對高兵部宇泰始爲作傳附之忠介傳後踰三十七年有游僧至鄞冒稱檢討送歸錢氏其親屬叩之語不符詐窮而遁侍御爲文以辨其



事

續耆  
舊傳

勾餘土音擬薤露詞

援軍來

錢檢討守城

海風作聲響野馬吹塵埃城頭望眼穿謂是援軍來望援  
如望歲燕犒日豫排賀蘭長道遙苦口總不諧可有張令  
公倍道開雲霾襄陽已呼吸易子更析骸相公且勿憂天  
意或未乖就令天意乖吾志終勿摧請吹晉陽笳驅彼北  
馬回

錢職方肅遴

字兼三忠介第七弟也諸生善書乙酉以豫倡義功授推  
官不受從兄航海累官尚書職方郎辛卯歸家甲午乙未

四明談助

卷三

四

間復奔走海上已亥豫于長江之役事去挈妻亡命崑山

佯狂而死其妻鮑氏有苦節

續耆  
舊傳

鮑安人奇節

錢兵部肅遴之妻鮑安人方未國難時已納采甫欲娶而  
難作時兵部從軍入閩鮑氏父兄以其必無生還之望欲  
更擇婿安人不可乃遽嚙臂出血爲誓其家愕然而止已  
丑兵部從亡翁洲辛卯翁洲破來歸始成婚安人之年二  
十六矣及大將軍宜爾德之再下翁洲也兵部與弟推官  
先期入告追兵及之推官死焉兵部亡命是時兵部同祖  
兄弟有通籍者恐兵部出入焦原無已時終爲家門之累  
頗相齟兀兵部乃挈眷居崑山思得間爲入海計也已亥

蒼水又入長江兵部又從之已而兵敗怏怏不自得以死  
安人勉治殯殮祝髮爲尼與長洲殉難忠臣劉公瞻之夫  
人同居一草庵中泣血紡績以求歸貲數年始得呼其弟  
至崑負骨以歸或勸以焚化輒哭拒之卒葬之君舅瑞安  
公墓旁而身學道於戒珠菴及兄公侍御舉子濬恭乃歸  
撫之若已所出臨終謂濬恭曰我死當葬汝叔墓旁無得  
用空門禮也濬恭乃以命服殮而合兆焉是時黃山汪侍  
郎沐日亂後爲僧其卒也議者謂當以儒服殮而其徒不  
可葢泥於侍郎之無遺命也安人之見卓矣鮚埼亭集外編

勾餘土音擬薤露詞

得正斃

錢貞婦返服

四明談助

卷三

四

宋家王魏公且末命用緇衣誰其持正議郎壻有蘓耆得  
正而斃乃卽安詎以異教妄販衣我生不造溷于尼歸骨  
撫孤非尼所爲我乃職方之故妻返我服始全歸

錢推官肅典

推官爲忠節公第九弟避地瑞安聞魯王在健跳私上箋  
問起居事露死未幾兄肅遴亦死弟肅采終身不娶錢志忠節  
公連傳忠介與弟肅範肅遴肅典俱死于王事稱錢氏四忠  
有記詳鮚埼亭集外編

勾餘土音擬薤露詞

阿兄遲我久

錢推官被禽

阿瞞不差走繞樹依枝亦孔之醜我今三十六着竟何有

我羞走感君意良厚阿兄遲我久不見白馬素車三江口  
錢隱君肅采

字子亮忠介公第十弟也乙酉年方十二在軍中次年隨  
兄乘桴在化南海濱之間昕夕不離左右忠介治戎之暇  
卽課先生讀楚詞擊竹如意以和之己丑從入翁洲辛卯  
懂而得脫時先生正盛年顧胸次惻惻自以不得從兄遂  
東西奔走所至授村童以自給不肯歸家亦不肯娶婦甲  
寅卒于淮上忠介諸弟各有志節先生雖以令終其視檢  
討推官之義烈正未嘗不同亦可感也夫

續耆  
舊傳

錢隱君肅臨

字二成一字方雪忠介公族弟也吾鄉錢氏于明室稱世

四明談助

卷三

四六

臣甲乙而後忠介兄弟四人死于王事其不降不辱者自  
退山侍御外如肅度肅繡肅文皆江上遺臣而隱君之埋  
身土室亦其一也善畫蘭顧未嘗輕爲人作其集不戒于  
火族子中盛僅得諸灰燼之餘

續耆  
舊傳

錢八將軍肅繡

字文卿太保忠介公同七世祖弟世所稱錢八將軍者也  
錢氏爲吾鄉望族無有以勇力見者太保尤孱弱而文卿  
獨力扼虎射命中飲酒可數斗飲愈醉膽愈壯仰天振纓  
意氣橫舉太保起兵其同產弟從軍者四人從子一人又  
族弟二人曰肅文肅度忽于衆中見文卿仗策請自効太  
保以其恃勇恐至蹉跌遏之不許列名文卿變姓名注籍

諸將幕下及太保親視師賊曰汝必欲隨征耶江上出戰  
文卿爲先茅浮白大呼挺矛直前嘗中利刃腸出不及納  
一手攬之一手格鬪不止卒連斫二人始得還營一軍皆  
驚而文卿意氣自若其時太保軍中多魁士如江子雲王  
征南皆百夫之特而文卿以兄弟尤勤于護衛幾如魏武  
之有許褚顧太保時時憤諸營濫邀爵賞爲偏裨樹恩澤  
故文卿在行間積功甚多而官止叅將兵解以後窮老桑  
麻之間掩關不敢輕出惟恐爲霸陵之尉所呵而日飲無  
何鬱鬱以死身死之後世亦無復知之者悲夫文卿事太  
保甚謹是時淡巴菰初出然薦紳士人無用之者文卿一  
見好之太保見而怒鞭之文卿惶恐扶服謝過太保撫之

四明談助

卷三

四七

而止嗚呼此其所以爲忠義之子弟也

鮎埼亭集外編

錢東廬徵君廉暨子中盛

字稚廉山東提學副使啓忠之第三子以講學名世當太  
保忠介公舉義時太恭人挈徵君避地武林依外家改姓  
高事定乃復姓稍長勵志讀書數學兵法無不究心耿精  
忠之變總督李公之芳因出副使門下招徵君入幕府問  
策徵君按王遁術用火攻師遂大捷叙功當授官以母老  
辭平生周卹三黨傾束修所入以給詩豪岸如其人所著  
有東廬集又輯錢氏詩文在茲集蓋紀善以後之文獻也  
子中盛字又起一字芍庭太學生芍庭于續錄耆舊詩時  
力任採訪之職得一集不啻拱璧卽有片詞隻句足以入

選不朽則大暑走烈日中窮冬冒風雪重趺不惜也又求  
枌社諸先正金石文老眼秃筆手抄不息兀兀成編際盛  
字在德又字春圃諸生亦能詩

鮚崎亭集

### 錢文學魯恭

字漢臣一字果齋知臨江府若廣曾孫也學于梨洲之門  
梨洲嘗語人曰漢臣學三年可以大成不幸年二十七而

歿

續考舊傳

### 錢氏多佞佛

吾鄉城東錢氏世有賢者顧多佞佛清溪以宗門講學寧  
國逃禪更甚忠介雖稍減而未淨蠶菴則渾身陷入矣忠  
介夫人董氏在太倉日禮法華蠟光成青蓮有如來瓔珞

### 四明談助

### 卷三

四八

寶相結跏其上見者驚異余曰此癡絕而成幻景也人當  
久病心氣所注嘗有鬼神臨之皆此類耳非有志壹動氣  
之徵也同時海岸儀部禮洛伽見大士現身天際霓幢露  
葆訝為蜃市既而悟曰此大士也余曰此乃真蜃市也海  
岸初一念不錯而轉念附會之妄矣大都斯人神明之感  
足以造一切光景見羹見牆思之既切遂有此耳然則如  
來大士之見亦猶此矣

鮚崎亭集  
破惑論

勾餘土音詠芍庭先世故蹟

### 芍藥泚

詩話芍藥泚卽潛龍漕城東最勝之地其地脉遠自慈  
谿驃騎山來

驃騎山頭雲散作千紅藥飛度東江東水中長綽約

具慶堂

詩話明韓邸所以賜紀善安也

皇皇具慶字出自名王邸白髮對綵衣奎光照梓里

畫錦坊

詩話大方伯奐名德世不盡知惟半湖陳副使槐謂其

生平足比薛河津瑄王三原恕在同鄉足比楊文懿守

可以想見其人矣今諸子孫亦不過稱其盛勲予特表

而出之

方伯真偉人足與楊守陳本匹但夸畫錦行未足盡名德

清風軒

四明談助

卷三

詩話陽明所以贈副使瓚

草堂廉吏居至今木石清陽明有墨妙歷劫猶芳馨

正氣堂

詩話臨江太守若直節崢嶸遂遭一麾誣為酷吏滿朝

稱枉獨于文定公行筆塵猶信仇人謗口大詆之以此

知君子之言亦有悞者

有孫如文山湖源自崑崙嶠強臨江守空堂正氣存

漱石居

詩話清溪學使啓之居也清溪嘗結千秋不朽社而雅

好談禪

漱石以礪齒千秋足不朽閒情寄宗門蔡黃真吾友謂雲

怡海

也岸

歸來閣

詩話蟄翁光緒為寧國太守啓忠子石齋黃先生周道徒也晚

歲談禪而嚼龜不輟

蟄翁漳海徒晚歲逃禪閣旦旦嚼龜羹此中知有託

鎮安橋

縣東演武場南明嘉靖九年里人嚴訖等請開新河率眾同  
建東接大石橋磳西通江口闡為今要害之衝云曹志

鎮安橋連氏

東善人連公德章字志文素貧乏以勤儉起家好行善事人  
稱東善人者以西郊金谷亭亦有善人之號而名也然西善

四明談助

卷三

五

人不及東善人之真以行善不欲人知也每出門必隨身備  
數百錢遇有窮餓之家以錢暗擲不使人知親友中有喪葬  
不能舉鄉會試不能赴者告貸無不應虞明經廷煜善人之  
婿也館于其家教諸孫今長孫飛熊道光二年舉于鄉三四  
孫已補諸生

神農殿

太守迎春每于神農殿設坐禮殿前隴畝稱一號田

李杲堂鄭東竹枝詞

出郭先經東鄧橋綠楊樹下且逍遙隣翁相約還乘興一號

田頭看插苗

綠楊樹下一號田頭  
俱東郭之最近者

好風好雨不須祈新穀垂垂眼看肥常是西村遲半月東田

早得救公饑

救公饑早穀名東郡最先出者

早穀可紅六十日晚禾猶自等西風家家烏撒嘗新飯勒馬

看登新廩充

紅六十日等西風烏撒米勒馬看俱東鄉早晚穀名

賀成廟

縣東演武場南分祀賀秘監舊在江滸之故前堰名賀家菴後移建今地額曰賀成意以賀菴新徙而名之俗改爲賀丞者誤賀公未嘗爲丞也

聞志

永利菴

明嘉靖間大石磳成卽建菴召僧居之沈文恭公磳記云菴以磳設名曰永利所沾漑田起甬東一都至三十都凡三十七萬畝贍田二十畝給僧俾司磳之啓閉後贍田漸廢萬歷

四明談助

卷三

五十一

四十四年郡判梁大材重修

國朝康熙間重築水池

聞志

積慶菴

元至正間毒海禪師建明嘉靖間張氏捐建山門 國朝寂乾重葺聞志門對青疇殿宇修整後樓更靜常有應試者讀書其中嘉慶初年燬後重建

廟堰磳

在二十都三圖北距大石磳五里南距蕭臯磳十里舊志俱無廟堰磳之名里老相傳謂宋有鍾令者創是磳民德之建廟磳旁洎磳廢廟遷水患復作乃于廟址築堰設磳以宣之因名廟堰磳或謂今之鍾廉廟卽創是磳之神也乾隆五十

二年據里呈開復

錢志



四明談助卷三十二

陳山脉沿江西行自一都轉南爲東郭之東西至賣席橋河南至廟堰磬者已詳于上其自一都西行者經沿江水厰至鹽倉漕底轉南復沿江經楊柳道頭兩分一股直出後塘街至澄波橋過河西由新河底演武塲至大石磬東由百丈街迎春巷大埠頭至鎮安橋河止上有水厰厲孝子居楊文元舊里林家道頭閘包氏世家義鷺冢鮑孝子居李朝散祠下番灘太保廟浦口閘高階沿張氏甬洲書莊澄波橋分水新河底王氏倪孝子居迎春巷李氏鍾氏雙井大埠頭張氏等跡一股從楊柳道頭轉東經王家墳五河橋梅山池東行至補陀寺東河止上有太白莊甬東艸堂徵君廟古栖心寺補

四明談助

卷三十二

陀寺舊鄞尉治茅亭熙春亭彩虹橋吳氏石水缸張氏史狀元第等蹟所有事物詩歌遞詳于後

水厰

水厰窖田覆草中脊建甌前後峻削如馬鬣封然不至積雨滲漏地上藉之以草通長溝冬月擡冰至滿必使封固周密旁不通風下可洩水庶無消化之患至夏月應用每日江船運開諸厰皆然連綿十餘里不斷

李杲堂竹枝詞

魚鮮五月味偏增積凍中艫氣自凝未出洋船先貴買幾家  
窖得一田冰

附藏雪

自古藏冰蓋有用也見于周禮并詩至本朝始藏雪唐高宗朝方士明崇儼取以進云自山陰得來蓋是時未知藏雪也今余鄉亦能藏雪見說初無甚難藏雪之處其中亦可藏酒及粗梨橘柚諸果久爲寒氣所侵至夏取出光彩燦然如新而酒尤香冽余性喜食果近得此方可以娛老若酒則非余所嗜也

甕牖開評

### 鹽倉漕

漕底近爬江鰲胡氏墓臨河雜木陰森漕口卽大河橋

### 屋簷頭厲氏

### 厲孝子顯祖

字兆禎國學生幼入塾讀小學師爲講古孝養事由是晨

### 四明談助

### 卷三

昏諸小節頗仿行其一二及長授徒以養親嘗館鹽場俞氏一日大雨平地水尺餘傍晚有告以父疾者亟歸時昏黑阡陌潦沒不可辨屢蹶屢起五鼓抵家衣袴俱淋漓妻請易叱弗顧詳問父所苦父曰吾不憂汝疾乎乃易之醫禱脩至踰旬竟不起治喪一如禮服闋適屆秋試戚友欲拉之俱概謝不應以母責之切勉強束裝甫至越城夢人貽以二棗忽心動曰棗得非棘人之謂乎二棗指吾兄弟二人也卽棄舟徒步返則母以暴疾卒猶得視含殮自後凡見服物器用爲親所遺者必流涕閭黨呼厲孝子與弟至友愛嘗被盜家人請告捕曰彼迫于饑寒耳一被獲卽終身不得齒于鄉姑置之次日侵晨見牆陰物累累皆所

失者蓋盜感其言而擲還之也觀察孫公諡特書醇德二字旌其門年八十三卒長子世儀登雍正癸卯賢書次世仁舉右科榜卷存稿乾隆間諸生山學建學其後人也

### 三江東楊氏

#### 楊文元公簡

字敬仲遷居慈谿學者稱慈湖先生乾道五年進士終寶謨閣學士諡文元子恪歷官福建通判克承家學曹慈湖志先生之父庭顯人稱老楊先生傳俱見鎮明嶺正學祠下句餘土音賦楊文元公舊里

淳熙正學推四公慈湖先生為最雄降生實在三江東是夜祥光貫白虹連理之楊連理笋弟兄和氣與天通卽用慈湖

### 四明談助

#### 卷三

連理瑞詩先生踐履真溫恭一念不妄歸冲融涑水橫渠將無

同頗疑言覺言悟近禪宗殆為中人以下資發蒙先生講堂在碧沚西湖花鳥歸春風絳紗不以身後冷鄉校肄業猶雍雍慶元學宮別有慈湖肄業諸生獨為一齋見寶慶志陋儒門戶妄相攻言朱言陸總朦朧試問生平踐履果何似尚其泥首三江東

### 稅關

在三江口東岸凡大小商船出入于此查驗給照不使夾帶偷漏寧紹台海防兵備道任其事

### 林家道頭閘

縣東三里許延祐志稱故址猶存明洪武初信國公湯和以林家道頭閘其水自寶幢而來綿亘四十餘里勢如利矢直

射郡城在堪輿家所深忌于是并其故址而廢之且鬻其地于並閘之民爲廬舍李志磬之水道從府主廟石戲臺下向西直出落江亦烏豐磬之一也今里人移其溝于會館東廂下落江按沈蛟門重修大石磬記云江東大石者烏豐之第三第四磬磬有五此居其要又云有所以除其害而後其利全既三倍大石之洞則烏豐之他湮可無問則知大石本一洞改而爲三自無水患其餘閘不設可也

江東包氏 甬上族望表包氏御史澤一望

開科進士包公莘

字尹耕弱冠通六經與王厚孫張原楷齊名人稱四明三先生洪武三年進士授湖廣新城縣丞以詿誤免詳李志

四明談助

卷三

四

所著有蛟川集

御史包公澤

字民望登宏治九年進士拜監察御史巡按湖廣奏藩臬不職者勒王府侵田歸之民所至望風解印綬去時有閩羅包老之稱性孝友二親早世諸弟妹力爲撫字宦成積俸置田爲諸昆弟祭葬之需仲弟浩好施稱于鄉里孫大

燿嘉靖三十八年進士官郎中

嘉靖志

御史轉知府包公溥

字民敬侍御澤之從弟宏治三年進士任南京監察御史以風裁稱轉泉州知府庭鮮滯訟入覲卒囊無十金人稱包孝廉云弟沐字民新以貢授石埭訓導

嘉靖志



能不委蛇貴游間然其登高弔古胸中磊塊有不可消滅者倦游而歸環堵蕭然而歌聲出金石浩浩落落如故也京兆之序足以盡夕齋之生平卽以爲其傳續者舊傳

包夕齋移歸舊居詩

參政門庭異昔時小江高柳不堪思

舊居得之參政張白齋先生後人小江高

柳是吾家先生詩也

蒸嘗得奉先人宅伏臘曾親孝子祠

予向居董徵君祠下

聲度竹來風有韻影移花去月先知獨尋雙樹憐棲鳥久

失歸飛繞一枝

舊有桐桂二樹高可揀天

風爲四壁月爲門籬落虛攔枯樹根過客有時停杖履居人隨意放雞豚頽垣易見蓬蒿長荒徑難言松菊存留得半間殘屋在往來一任雨翻盆

四明談助

卷三

包孝子幹鄭

字惠人八歲喪父奉母唯謹每侵晨起候于江滸見漁舟擗其大者攜歸漁人習之得巨鱗曰此包母饌也母患頭暈百方治療不痊乃刺指血寫疏籲天求以身代母恍惚中若有授以藥者頓愈長兄早沒有祀屋一區歲租悉以奉嫂母卒營葬畢卽築廬墓旁三年始返值忌日涕泣如初喪乾隆三十七年有司以孝行上聞詔旌其門錢志

包教諭之麟

字石公乾隆壬子順天舉人官蕭山學教諭著蕉雨山房

集客雄偶吟

錢志

包南江旭章

字曉文乾隆十七年進士知南江縣甫九月卒著有四明志補數卷蓋就所見者錄之亦能留心里中掌故者也錢志姪祖賢字敬齋乾隆癸未進士官建水知縣著介軒集

### 義鷺塚

江東包氏婦黃氏長沙府通判黃惠之女婺居四十年家有一雛鷺方脫卵一日遂失其母黃氏飼之起居相隨逾數月而鷺輒能解主意遂不忍供賓饌一夕黃氏疾作鷺卽哀鳴繞牀黃氏卒復啄柩鳴繞凡百日而鷺絕食竟死柩下黃氏子松哀之置竹器坎地瘞之封土名義鷺塚梓里漫記

### 楊柳道頭李氏

五河橋之西有李氏宗祠未知是宋時李朝散舊居否

### 四明談助

### 卷三

### 李朝散元白

秦化人受業于舒文靖傳毛詩學歸教其家與子以稱同登嘉定十年進士第其後以制以益嗣伯誨伯俱踵世科門人以次傳授黃應春杜夢觀安劉王良學其傑然者蓋毛詩之學惟文靖與楊博士探得其淵懿文靖又傳元白故奉之詩學最盛在鄞惟王文貫首稱云曹志

### 勾餘十音賦李朝散祠

三江慈湖里奎芒騰列宿慈湖既西遷光前孰輝後廣平謂舒有高弟系出忠臣胄朝散之祖曾起義兵逐金人明德產達者學統所鍾厚况兼永嘉謂葉傳經制妙指授禮疑三鄭

支詩笑二毛陋坐言而起行賑卹有名奏區區夸世科不

過其小就頗聞殘元時遺宮尚俎豆見鄭子集斯人不悅學  
掌故失推究誰從魚鹽中爲振講堂舊

袁陶軒鄧北雜詩

三江凝望幾徘徊想像當年第宅開楊子才移慈水去李  
君又自奉川來

楊文元簡李朝散元白居三江口並見甬上族望表

後塘街

漢後塘街在縣東同谷山口因是時鄧縣在谷中海人集貨  
貿易于谷口以在海塘之後而名之也今鄞縣在甬江之濱  
海人貿易多在甬江兩岸于東岸一帶亦稱後塘街

李杲堂鄧東竹枝詞

四明談助

卷三

八

千萬魚鯉疊水厓常行怕到後塘街腥風一市人吹慣夾路  
都將水族排

鮑孝子斃路

鮑孝子倫字孟彝甫七歲父疇游學吳楚莫知所向倫稍長  
卽治賈孝養母孫氏朔望焚香哀禱願父子終相見如是者  
二十年忽有老人言自慈谿來謂孝子曰汝父前與吾客湖  
廣至漢陽東鵑授徒贅婦生二女不幸死矣盍往歸其櫬已  
而至慈谿徧訪老人不得乃如其言詣漢陽跡之皆符婦家  
疑有他故訟于縣不能決縣上府府上監司監司謂疑獄錄  
有刺血驗骸事親至墓所發棺命倫齧指血瀝之果入枯骨  
倫情得伸卽棺斂請歸葬許之監司乃慈谿顧瑛也老人托



言慈谿殆天所啓也孝子慈惠好施嘗捐金伐石甃甬東大街且暗通水道免魚鹽汗潦之累人皆以仁孝頌焉聞志

下番灘

縣東一里餘鄞江之濱元時諸番互市于此故名聞志

太保廟

東平忠靖王廟俗稱太保廟在縣東三里東津橋北祀唐張巡相傳宋高宗駐蹕東津神嘗效靈故勅祀之聞志

錢家道頭閘

卽今江東碶閘自浦口橋至棲心寺橋東西相距不過半里是則無犯于堪輿家者因直通其湮塞而復其故道云李浦志

口橋今稱碶浦亦烏豐五碶之一棲心寺橋舊名崇壽橋此

四明談助

卷三

九

碶之宜開與否看沈蛟門重修大石碶記自知

高階沿張氏

門臨澄波橋河宅內堂階較大概加一級故稱高階沿

義士張公文英

字君秀行明五讀書好義居甬東隅修砌百丈街石建亭浮橋側賜茶水兼安宿守橋之夫及卒衆皆德之卽亭爲祠歲祀不廢次子仲容洪武初奏領戶部勘合准張氏世守焉事詳聞志

張先生憬

字景心少有詩名更善于書法時謂其詩音律冲妙超然有復古之功同郡都御史張公楷雅以詩法自許惟于先

生最相引重晚年學道居吳山之紫陽宮遂不復出以詩法及書傳從孫琦盡得其妙卽所稱白齋先生爲吾鄉詞人之冠者也故推其家學所本特書之

耆舊傳

### 張工部禮

字德和以太學生選知江陵縣遷工部主事出知常州府命下而卒公始知江陵時朝命督府征交趾兵過處守令無不遭譴者道江陵公以鼎肉餉軍一軍盡喜督府奇之欲試公倉卒日晡時以令鑪立取火爐及架數百公卽命木工以方膝桌鋸半脚剝其中置鑊然火又取竹束火燎數千卽盡收民家葦簾立應之又取馬槽千餘公卽命匠及各戶婦人以棉布縫成槽綴槽口以繩以木椿張其四

### 四明談助

### 卷三

十

角飼馬良便卷收軍中遂足用督府歎曰此真應變才也遷工部主事從子參政琦所論著公事最詳

耆舊傳

### 參政張白齋先生琦

字君玉年十二卽能賦詩每讀書至夜分稍倦則與其徒取水夜噴面使神氣復立乃更讀其勵志若此年及艾始中進士授南大理評事歷陞寺副正出知福建興化府爲政尚簡易清靜有古良二千石風以疾力乞骸骨陞右參政致仕先生操行廉白家無遺財人號曰白齋先生里居十六年惟以撰述爲事日怡情于林泉雲鳥間嘗自贊曰辭讓太早似乎失利木石無虞何謂不智愛山一與樂水一舟未死微軀已卜荒邱未謝之日不煩飾修生也旣順

死復何求卒年八十有一著有白齋集竹里館集子嘉慶  
字開祖太學生亦奇士爲詩殊有父風余嘗讀白齋絕句  
有示予詩一首曰吾兒才高須隳括官樣文章不在奇人  
道筍高能過毋丁寧養護鳳凰枝卽其父亦奇之矣詳舊傳  
附錄白齋里居詩九首

包氏東園

理蔓牽新綠疏泉放落紅敲門春午寂有客夏黃公

贈李先生棟塘

棟塘仙凡在人間野氣春陰水一灣小艇不量輕與重晚  
來撐出載青山

閒居

四明談助

卷三

十一

不爭棋道懶彈琴臨帖觀書偶用心新水鷺黃三百個門  
東流過是山陰

門前小雨罨輕埃江上晴山帶薄雷我鶴比凡高一格茶  
烟生處却飛來

山乘木屐水乘船綠柳門前畧似陶客亦可來無大嚼黃  
雞秋壯一拳高

山客敲門不肯應青藤倚壁坐橫肱秋懷萬里誰知我天  
目孤雲雁宕僧

不入城

不入城而又入城半生心跡未分明乍逢麋鹿相招去今  
覺山林有路行越絕漫須悲往事吳歌且自學新聲雪蕉

霜柳垂垂在寒對衰翁亦有情

出郭

一部新詩一部蛙夕陽出郭路幽斜水邊地冷苔生髮山  
外民貧竹有花厖犬上牆嗔過客牛羊下嶺逐歸鴉誰歌  
白石南山岸不是陶家是寧家

山中歌

深山古苔滿地碧淺山流泉走白石深山不接淺山雲今  
人還尋古人迹漆園先生竹皮冠芙蓉衣薄秋風寒秋風  
寒欲歸去昏鴉栖滿溪頭樹

張徵君瑞

號甬洲義士明五公裔天姿卓異篤志博古幼補諸生兩

四明談助

卷三

三

經薦辟以母老力辭築甬洲書莊聚書萬卷與子姓講習  
其中暇則喜爲詩賦子詡孫緩曾孫大萃俱名諸生元孫  
采臣登順治甲午賢書世以淳德文行稱詳聞族孫世玉  
乾隆壬午府學歲貢世鎮乾隆甲辰縣學歲貢

澄波橋河分水

澄波橋舊名夾家橋沿江脉自北向南過河其水兩分西卽  
入江東由補陀寺前出高滙橋達補陀寺東河

新河府王氏

其先不知所自近年連出二科

王淑元道光元年順天舉人 王瑩道光二年舉人

新河

在演武場東明嘉靖九年父老應文澄嚴池等請于知縣黃仁山引橫溪河之水由大石橋入演武場西轅門止李志

### 演武場

府治東五里東津關南周圍二百七十九丈五尺有演武廳

中軍臺關王廟嘉靖三十四年郡守邱玳復闢小教場于天

寧寺東聞志

李杲堂竹枝詞

往年御史出巡方定坐江東大教場一樣三軍排陣伍饒歌

齊奏獻倭王軍中有扮倭者十人其食糧倍于軍士

### 大石磧

在縣東城外一里天童育王兩山之水自此入江歲久湮塞

### 四明談助 卷三

宋淳祐間郡守陳塏新訪古跡得斷石沙磧中遂于橋下作

平水石堰而于浦口置閘立橋內可以洩水外可以捍潮至正

續志元末浦漲堰閘皆廢址入演武場一遇大水東七鄉之民

病昏墊嘉靖間張尚書時徹力言于府縣尋故道而問之廢

舊大石橋磧俗名四眼磧于今橋下甃石置閘由是衆流皆

由此入江上流無泛溢之患李志沈蛟門重修記畧見聞錢二

### 志

### 百丈街倪孝子

倪割猪江東人幼喪父善事母以豮豕為業故鄉俗呼倪割

猪云永樂間母受佛氏戒不如葷腥久之身羸病臥十八年

晨夕煮粥哺之垢痒則採取藥草煎湯扶之浴如廁則藉溫

軟物而抱坐之每勸母食肉不從懇求代爲茹素而後許乃具肥甘供養每夜灑天叩首數百額成癢疹若巨珠然遠近召其積豕者見其額輒咨嗟不已必多與錢穀以酬之

嘉靖志

迎春巷李氏鍾氏

李石梁先生奎

先生別字石梁少爲俠嘗白日殺人市中得脫後十餘年始歸更折節讀書通大義尤工于醫上自內外旁經以下至諸名家言無不畢覽心揣摩手追盡得其妙故先生所爲醫能窺見臧府所全活甚多然先生終不自言一日同舍生誤吞指爪寸許梗喉中幾死諸醫者俱不能下先生至請各剪諸君指爪煨服之可銷也已而果然或問此故方

四明談助

卷五

十四

耶先生笑應曰不然此內經所謂衰之以屬者也聞者畢服好古金石器及收近世諸名公墨蹟所居植草卉數十百種手自培灌喜交一時名士望其衣冠無不欣然相接當甲申前二年嘗過李氏東皋艸堂止宿與杲堂劇談至夜分先生從容謂杲堂曰江南行及亂矣吾老或填溝壑不見子宜善藏其用可早之山居得壩地十畝植藥味果蔬足代穀食者因條次物性及所植節候計一歲可充十月糧杲堂然其言後二年國難作江東起兵先生適已卒

年八十三

探杲堂文鈔

石梁世居甬東去大江不遠築室居之登高望遠讀書自得類古之有道者非塵俗方技中人也其切脉最精其辨

症最確嘗有一少年詣靈橋門有事直趨而往偶失足傾仆于地眼中瞳神忽脫出尺許止一絲帶住不斷急請石梁治之石梁曰此好色之過肝腎虛極所致也急令以瞳神養香油中扶住不動爲定一方用熟地一兩當歸五錢枸杞五錢又用羌活五分澤瀉一錢五分急煎服之藥一入口瞳神霍然自上其效如神此方所以效者熟地補腎當歸補肝枸杞助目善矣而其妙全在羌活澤瀉兩味一以引經入眼一以瀉邪火俾升者有所降也石梁處方一筆不苟書法亦工嘗教人稱藥量水共藥重幾兩用水幾鍾其慎若此

採師經堂集

石梁醫學得益于李蘭泉後授徐遂

生

四明談助

卷三

五

鍾息齋先生鳴雷

字奮若崇禎時諸生世居江東之百丈街時江東如錢氏史氏皆以世家鉅族主張文學而先生以一介書生與之爭長蓋所習專主春秋而諸子百家之學莫不涉獵貫串背誦如流水學者由是敬服入學未久卽遭滄桑之變興朝鼎革士子莫不改頭換面爭圖進取而先生岸然自負不沾沾聲利間方巾布袍徐行緩步以勝國諸生自處每遇長筵廣坐援古証今娓娓不休四座皆歛衽以聽其風裁之峻潔如是著有麟經歌訣息齋詩文集

採師經堂集

明

江東雙井

縣東三里其源自大涵山來味極甘冽甚雖旱不竭井上石竇二故名

開志

大埠頭張氏

宋張文節公第二十一世孫善懦號懦菴自荻埭遷居江東大埠頭增創門第稱爲甬東巨室子四鐘鏞鑑鎮

張明府鏞

字致用以明經應天順壬午制貢出宰蜀夔州開縣恤民疾苦興學校士風丕變三載考績仍復任會丁父艱歸以母老終養不復仕人咸服其孝義弟鎮授宣義郎鑑贈承德郎亳州同知子二澄清

張二尹澄

四明談助

卷三

六

字文靜號東川補諸生屢試不售納貲入太學嘉靖初循例授江西永豐縣簿爲民興利除害在任七年陞湖廣長沙縣丞以病乞歸公孝友性成奉養令君及母袁太孺人服勤無怠執喪尤盡禮撫弟篤愛人無間言置園亭于東川之上日與朋舊怡情以終天年子二應麟應鳳

張光祿應麟

字元祥號平洲由例貢除光祿寺監事陞大官署署丞行止謹約急流勇退晚積豐資居恒泊然事母李太安人伺候唯謹且篤愛幼弟若忘其爲異出者子一子用

張鴻臚子用

字靜甫號雲溪銳意編摩文品稱最且工書法善繪事年



十八補諸生以例入成均性好延納門多長者車如侍御  
范東明太史袁懋中皆相得歡甚倭寇告警都憲胡梅林  
巡視海上慕雲溪之名遇玉帳甫閒輒叱馭造廬劇飲沾  
醉而別然遭逢不偶屢戰屢北因而循例就職授鴻臚寺  
序班時袁公已大拜矣契愛甚摯一日在朝房以候久假  
寐猝然而疾竟以身隕年三十九歲子二孔章諸生問策  
清河縣丞

### 張文學翼

字仲升號拱薇諸生孔章之子幼而失怙每泣不止稍長  
習經史補諸生勵精家務先是儒菴公卜基于邊家嶺之  
東爲大莊公改名漱芳園置樓臺爲覽勝之處與里中友

### 四明談助

### 卷三

七

孫發若輩陶情詩酒有漱芳集詩行世子六泰來嘉禎嘉  
祥嘉祺嘉祉嘉祐五子俱諸生幼子兵部主事 文學翼  
第五子嘉祉之後忠芳乾隆己酉順天舉人候選知縣卒  
第六子嘉祐之後廣銓嘉慶丙子舉人

### 張明經南宿

號晴峯諸生嘉祺之孫雍正癸卯恩貢母全氏于謝山太  
史爲中表姻其窆石銘謝山所撰子三尚琦尚煜尚輅  
以上俱見大埠頭張氏小宗譜

光祿應麟之弟應鳳廣東鹽運司提舉其裔孫得春中萬  
歷己酉舉人由知縣陞通判訖 本朝而其祀遂絕鴻臚  
子用曾孫名嘉昂鼎革時隱于醫寓海鹽聯寓客十九人

為萍社有萍社詩草

見謝山續書舊傳

子英以海寧籍中康熙癸

丑進士官戶部郎中四明族望表以詩人嘉暘為一望

見傳

張氏下

### 王家墳

一都豚從楊柳道頭轉東者先經王家墳在三眼橋天童下院後面北宋直閣王公庭秀之墓

甬上族望表同時鄞慈各有王庭秀其以詩名者鄞人也直閣之詩工矣而深寧困學紀聞載其議論頗不盡純可怪也以其詩工列為一望

直閣王公庭秀

字穎彥入太學與楊龜山遊復學詩于黃山谷登政和上

### 四明談助

#### 卷三

六

舍後為殿中侍御史歷進中書省檢正卒與宰相議不合力引疾求去詔直秘閣主管崇道觀歸

詳延祐志

所著有航海

記磨衲集

耆舊傳

### 王通判壁

字子潤中書檢正庭秀之子先世居慈谿因葬父鄞之甬東遂居于鄞七歲日誦千言過目不忘宣和六年第進士年少氣銳以遠大自期紹興二年方復博學鴻詞科首冠其選終于待次通判士論惜之著相山集

聞志

### 五河橋

從江干楊柳道頭向東至王家墳之路橋下水進南有四汊一進橋轉東通長溝達梅山池頭一進橋經天童下院前由

三眼橋下直入至漕底一進橋直入過三眼橋轉西復向南  
至隱修菴左止一進橋卽轉西至楊柳道頭止合之出橋通  
東塘大河謂之五河橋

梅山池

縣甬東隅初爲包姓池今成義汲

聞志

邑令王忠烈公碑記

溯河源者必追星宿滙江澤者必本岷山蓋蒙泉發祥開百  
世斟酌之府九泥正未可封也鄞治襟江帶海東渡浮梁越  
數里有梅山池池上竹木森秀其徑幽而淨其泉甘而冽熙  
熙萬井咸取滙焉余入計復淹茲土冬久不雨皇皇用汲而  
包氏諸生且以爲祖澤觀魚於物樂郊不忍戕其生氣也爾

四明談助

卷三

九

時赴公堂者衆口嗷嗷一似文園病渴濡沫皆恩俯睇輿情  
方欲灑甘露濯金莖羣彼焦灼俱赴清冷爲快何忍以灌注  
微流致向隅飲泣乎况包姓睿哲名賢先後輝映安知非梅  
山池一派所翔洽而起縱令決此一勺普及西江則水師之  
象君子以容民畜衆誰不額首而頌甘泉耶將天一化生渙  
作龍光百道澤之解卽爲潛之飛同井者食其德而不忘其  
源不尤勝于沾沾涸鮒之爲繩武哉易尚同人卽于井之義  
下一註脚

太白莊

舊名太白樓宋守胡桀所建元程畏齋積齋二先生改爲讀  
書莊後圯至正間象山學教諭張原楷僑居于此復名太白

樓尋廢遺址尚存

嘉靖志

敬止錄云在浮橋東二里其廢址後

歸都御史李樾近歸之瑞巖和尚重建爲下院

李杲堂竹枝詞

扁舟記得下東鄉定泊吾家太白莊尚說山樓東眺處先生

乘醉寫柴桑

太白樓宋太守胡榘所建後屬吾家先子年先生德豐嘗讀書樓上醉中草陶公飲酒詩妙絕

一時今此卷墨跡尚存

貴陽守可比睢陽歸老城東五畝桑試問當朝執魁柄幾人

瀝血在封疆

先忠毅公守貴陽血戰經年卒破賊人謂功比睢陽竟歸老不出

甬東草堂

今不知其處李氏文獻錄云澄寰先生德昌字子文屏山生

嘉之子嗜讀秦漢諸書爲名諸生城東里許先生遺甬東草

四明談助

卷三

二十

堂一區先生移居相伴其中善接引後學一時胥願從之游

而吾宗更稱極盛卒之日里中皆哀慕不置焉

李賓父生寅同嚴蔡二友飲子禮姪甬東草堂

小庄去郭惟三里古塔臨江僅一層亂水絕憐人並過高樓

還與客初憑秋雲近海時時變晝雨如塵日日烝素業先生

留十載亭臺花木喜新增

徵君廟

宋勅封東漢董孝子純德徵君之行祠在補陀寺右今邑志

失載數十年前元宵燈火甚盛史慎齋侍郎有字畫四幅懸

于殿上筆力遒勁猶記其二詩云安車駟馬漫追尋高節應

堪媿子陵得祿已無親可養那能還受漢廷徵記得杜陵詩

何好歲時伏臘走村翁愚失愚婦知何事却到于今說董公  
棲心禪院

縣東五里舊號東津禪院唐大中十二年分寧令任景求初  
貫蘓州曾任明州判官遂家于鄞初治第甬東後徙豐樂鄉  
之東山下遂捨甬東居爲寺請心鏡大師居之會剡寇裘甫  
掠四明兵入寺師晏坐禪定不動盜衆叩禮而退咸通二年  
寇平郡奏其事請以棲心名寺旌師之德宋大中祥符元年  
賜棲心崇壽寺額政和八年有旨以有常住莊產寺院改建  
神霄玉清萬壽宮州以寺聞允焉後仍爲棲心寺明洪武二  
年燬改創養濟院二十年徙昌國補陀于郡城僧惟拳捨地  
以建內留東首址三分之一復建棲心永樂間僧併補陀棲

四明談助

卷三

心遂廢

敬止錄

心鏡大師藏奩

師俗姓朱氏蘓州華亭人唐大中間居棲心寺後居天童  
傳詳天童寺下郡守崔琪撰碑銘載敬止錄

補陀禪寺

距縣東三里原係南海昌國梅岑山寶陀寺明洪武二十年  
因寶陀懸隔海外乃徙建于古棲心寺地定名補陀成化志門  
外有七浮圖俗稱七塔寺永樂二十二年住持汝慶建圓通  
寶殿宣德七年永詵建毘廬閣天順二年文彬建藏閣大悲  
彌陀殿及廊廡嘉靖間建十王殿嘉靖志國朝順治間重建  
佛殿方丈山門鐘樓康熙間重修諸室 有雲來菴在一都

地爲本寺塔院超育建聞志

李杲堂竹枝詞

往年香客徧東家萬里來瞻小白華七塔寺前先禮拜鳥音

已得聽頰伽普陀山亦稱小白華

饑民逃生反死

寧郡瀕海水不易蓄每遇天旱卽歲歉戊午之春因隣郡告糴者多以致米價騰貴守令集衆紳士議勸捐賑濟城中設廠給米分三處延慶寺天寧寺萬壽寺江東一處七塔寺議明每名一升幼者五合年壯有業者不給凡老弱殘疾以及婦孺至俱陸續閉于殿中出則啓一戶逐一給籌至給米所見籌發米每日上午以放砲爲號砲後至者不給以杜互冒

四明談助

卷三

三

之弊各鄉村傳諭設廠無不皆然至戊辰歲歉又議賑濟各鄉村殷戶退後但委城中江東二地設廠饑民遠者亦先候蜂集七塔寺辦理不善以致一時擁擠踏死者四十三人傷者無算先是紳士議捐有欲照乾隆十六年編貧戶冊之法者以當事難之遂止至是始知前輩李滙川屠鴈湖諸先生預着的當人紛馳各鄉編貧戶冊之善然已悔無及矣

舊鄞尉治基近解院橋

新建鄞縣尉廳記清容居士集

郡治絕江爲古狹口號甬江綿亘百餘里鄞爲縣分東西以浮橋爲界東之民習網罟魚鹽以自業其地膏沃有湖可以灌浸率不善墾治春至輒率其子弟文身權歌出沒于海島

何危薄險對面成奸究憲合昭著至死有所不避尉以巡督  
爲職自宋雍熙間置尉治于彼蓋重其地以鎮遏迄今數百  
年遊手益夥捕繫無虛日解燬于兵踰五十年尉率其兵徒  
隨所寓無常地訊錄之所不具于觀瞻至治三年廬陵周君  
一夔來視故址曰吾不可不自重首爲外門復爲廨門中建  
聽事挾以寶榮輔以吏舍後設燕居以休其勞清流匯池花  
木列植周繚塗墻皆足以支永久吏有言者曰尉職在察盜  
囹圄不立奚尉之爲尉笑曰道德齊禮夫子之訓也獄市無  
擾相國之言也閱數月獄以空告于是與人有曰尉之申申  
非取異以求新塞其奸慝養其淳真彼疇鱗鱗良苗氤氳尉  
之去兮將以告夫後之人役始于泰定元年秋八月成于二

四明談助

卷三

年之二月郡人具官袁桷記

茅亭

在甬東書院南今廢

延祐志

宋甬東書院故址在棲心寺側亦

見延祐志

熙春亭

在茅亭之東紹興癸酉守韓璉建今廢

延祐志

彩虹橋吳氏

吳浩字若水乾隆甲寅

恩科舉人未仕卒族中有一捐職

富翁將其母

旌節石坊豎于祠門前突出當街里下控告

而當事亦不問欲榮其親而反致見惡于人其愚可笑書之  
以醒後人

石水缸張氏

門前有盛水方石缸張氏舊物也故有是名

張氏先世自宋南渡遷于鄞之甬東橫街是時相攜而至者三十有六家皆宦族也冠蓋相望宋時謂之錦繡街街盡磚砌至今猶有數十步之遺跡存焉逮元革宋命舉族不仕零落者百載元末兵燹之餘族譜遺失避亂播遷有遷于奉川者有遷于鄞之西壩者有遷于定之舟山者今俱不可攷其可考者則自嬾雲公始嬾雲八世孫應麟述

張太守誠號嬾雲永樂壬辰貢士授四川忠州知州陞重慶知府子恒號清隱諸生

張學博聰號東峯諸生清隱次子宏治戊午貢士授徽州祁

四明談助

卷三

三

門縣學訓導子鳳崗貢士鳳岑鳳嵩俱廩生

張孝廉應麒字瑞徵禮部儒士志禮之子萬歷戊午舉人

張明府應麟字振仲號鹿園志禮次子崇禎己卯舉人順治

辛丑會試副榜授平湖教諭陞直隸平鄉縣知縣

具見宗譜

史狀元第

縣東木蓮藤下順治乙未科狀元少宗伯史大成所居

聞志在

張斌橋南與木蓮藤下隔一大河史侍郎在甲亦居是宅今

張解元嘉金陳文學銘海僑寓後進

史贈公起揚

字見峯宋八行太師詔之裔兄弟三人兄早卒弟出爲人後贈公親老家落遂治生以事親後出繼弟貧不自支復



與合爨俟稍給始析去既而客死武林聞訃慟哭攜其喪歸弟婦及兩孤復與合爨訖有成立有再從兄弟之子二人孤貧撫于家使之學業授室寡姊老而失明養于家終其天年平生好周人之急善無不爲順治乙未子大成殿試第一名人咸謂厚德之報年七十七卒贈侍讀學士禮部侍郎史公大成

字及超號立菴登順治十二年進士廷試擬第三世祖章皇帝閱其對策改第一授修撰隨充日講官嘗講周易稱旨賜賚優渥其父思之繪已容以寄亦令子繪容寄父公得書悲惻故事京僚六年俸滿始得假歸公甫四年上書曰臣父思子不見思見子之儀容呼子不來頻呼子

四明談助

卷三

五

之名字臣而忍此不可以爲人子亦何以爲人臣世祖覽其奏情詞哀切特許之歸比歸父已卒康熙初服闋赴京累遷至禮部左侍郎同官有議裁孝子節婦廩給者公曰君謂子自爲其父婦自爲其夫何預朝廷而廩給之然則爲子不孝爲婦不節亦何預朝廷而國法必嚴之也議者愧屈十五年知貢舉往時科場條例甚苛點畫小疵必舉以繩士公但嚴內外之防一切寬其文法遂制爲令尋以病足乞歸篤于友誼與周隱君容戎隱君駿聲善容游京公適里居恤其家脩至駿聲卒于京公爲之殯盡禮年六十四卒賜祭葬著有八行堂集弟大進貢生官縉雲教諭造士有方士林稱之

續耆舊傳  
參曹志

鄞縣史立菴名大成其父好善與老衲號大成者往來甚善婦臨產見大成持鉢入室跡之不見至寺問之化矣立菴生遂以名之順治乙未狀元及第一生持齋見烏山徐慶徵信錄

禮部侍郎史公在甲

字姓忠號慎齋侍郎大成從子也甫生而父卒八歲復喪其母以孤童力學補諸生年四十餘始中康熙五十二年進士臚傳時 聖祖知爲大成姪特選入庶常後補編修出知山西汾州府歷遷左副都御史禮部右侍郎以足疾致仕歸卒年六十四公初舉賢書不能北上有齋夫助以金及宦成旋里召齋夫與禮食而厚遺之人以爲長者詳見

四明談助

卷三

三

錢志

館中贈史侍郎歸里詩序

鮑琦亭集外編

同里禮部侍郎史先生慎齋以雍正十有三年三月致仕南下先生之在九列尚稱茂齒顧以足疾乞休 天子優詔許之于是同館作爲歌詩以榮之而命祖望爲之序予嘗謂自科舉之制行而求世祿如六朝門第之盛已不可得若世科而并世其知止知足之節此雖古人未之或見者史氏自南宋以來甲第爲吾鄉第一枌榆里社不愧喬木世家其尤異者先生世父立庵先生以順治乙未大魁天下由翰林歷官禮部侍郎致仕乃甲子甫周而先生亦以名進士選館九遷亦至禮部亦未及年而乞休前光後輝

若合符節青門餞別乃昔侍杖履以隨行之地山陰道上  
香火依然後世有弇洲其人紀一朝之盛事以當外史佳  
話可不謂吾鄉之寵哉予又嘗攷史氏先世自開府儀同  
三司忠宣公華直閣獨善先生朝奉大夫鴻禧君並當家  
門極盛之時遺榮投老一時大儒晦翁慈湖攻媿西山諸  
公交口稱慕至今滄洲碧沚之間清風如在其亦家傳模  
楷至今猶有存者耶是則區區世祿與夫偶然履歷之符  
又不足爲先生道也至若先生以槐棘重臣敷歷有歲而  
未充其用 九重賢達之惜其與 魏闕之思有相資而  
愈永者不必予之縷縷而陳矣

張解元僑居

四明談助

卷三

七

張解元嘉金字鎔之僑居狀元府其先不知所自曾祖原  
紹納貲充織造府解衣官饒于財起大宅于包氏宅後祖  
載陽太學生父字東郊諸生俱保家之主每爲人所側目  
一日以獲送偷兒渡船中躍入于江被累數年至事直而  
家已盡落已宅屬于他人然善于作養鎔之與從弟嘉水  
字盈之俱幼補諸生盈之早沒鎔之先中副車遲之十年  
至嘉慶丙子科中解元爲人恂恂儒雅儉于自奉而事親  
能得懽心當發解時正值太夫人八秩壽誕張燈演劇連  
日喧阗狀元府前後廳堂久嫌闐寂至是爲新解元榮耀  
其親借以一用亦足壯人耳目不數年太夫人逝世葬祭  
盡禮日月逝矣烈士暮年壯心不已春風得意行當拭目

俟之

陳文學蕉隱軒

陳文學銘海字新涯明太史后岡先生之後自小溪後衛遷居江東灰街已數代矣父明經晴嶼先生基因舊居回祿遷于月湖三版橋喜博覽攷辨遇有未見書手錄不倦所居軒前有芭蕉數本而與其二子讀書偃息于其內毗陵錢學士竹汀過之爲書蕉隱二字以顏其額苾湖汪孝廉爲之記今新涯亦喜抄書且繪爲圖諸名士題詩滿幅亦韻事也古人云痛飲讀離騷便可稱名士新涯善飲而其妹丈張君鎔之爲尤善方卜宅于狀元府也掠之同居出則傳觴入則把卷酣暢淋漓且飲且讀室已喬遷而仍

四明談助

卷三

三

稱其軒曰蕉隱拾二三故舊觴咏其中不知其金之易盡并不知其屋之非已有也不亦達哉新涯與弟藻涯最友愛弟補諸生未幾卒今弟之子與其子皆好學亦皆喜抄書後衛一脉相延世家子弟其造詣正未可量也

四明談助卷三十三

四明東郭脈根于江東南支派者已錄于上茲再錄北郭而北郭亦隔大江其江源發于西四明脈卽隨之而行至慈谿驃騎山特分一支起青墩爲府治後坐自西而南而東水出鄞定橋其上有九十九墩顏公渠雁湖遊冶巷管絃樓顯德廟奈使君廟屠氏祖塋尚書墳屠氏舊宅吳清卿宅江北董氏盧氏桃花渡李氏引仙橋桃花渡等蹟所有事物詩歌列後

青墩

青墩體圓高于南郊崇法寺岡其脈根于西四明自慈谿驃騎山來登巔而望江流圓轉如環周圍約二十里而束峽在

四明談助

卷三十三

鄞定橋兩江相距僅半里天然爲府治之後坐郡邑志不載知之者少故不見題咏詩詞

九十九墩

桃花渡之北其地天成高阜九十有九其一入于江相傳望氣者故破壞之阻壓王氣使不成百也聞里人言猶有百井一在江邊没入水中水淺可見

顏公渠

自鄞桃花渡亘定海縣西市凡六十里原港久湮宋淳祐六年制守顏頤仲浚復故河深一丈二尺廣五丈鄞令趙希蒞定海令劉仲襄慈谿令季鏞命隸董役郡倅張琥總之民頌其德刻石曰顏公渠

寶慶志

歲久淤塞明嘉靖十五年鄞定二

邑大加浚治聞志

顏公渠通駱駝橋等處農時築壩于李磧渡使江水從丈亭而入灌溉鄞慈鎮各鄉田畝為利無窮 顏公榜示載敬止錄李董山贊載聞志

渠上鄞界四橋

孟陽橋舊名麥陽橋尚書屠浦建 敬思橋俗名馬郎橋在孟陽橋西為盧氏墓道盧份建見敬止錄

引仙橋去孟陽橋二十餘步 甄橋有鋪通定海縣界又名鄞定橋

鴈湖

桃花渡北顏公渠南秋冬有羣鴈集此因名周圍以丈計者四十有五聞志

游冶巷 管絃樓

四明談助 卷三

柳耆卿永為鹽場大使在定海曉峯當時所稱游冶巷管絃樓當在江北鄞定之交此外又有冶春亭玩江樓蛛蜘蛛墩花柳巷雜見于前人詩詞未知其處

顯德廟

在桃花渡北其神姓姚名器凡海艘遇颶者有禱即應元大德間都漕運萬戶盧榮感神效靈運道捐貲建祠久圯明成化間盧瑀從兄瑞大加修葺聞志成化乙酉神憑人語曰江北之地最稱靈人才由茲種種生試看屠瀟及盧瑀鹿鳴宴裡相賓興是秋二人果舉于鄉亦見聞志

奈使君廟

在桃花渡北相傳使君嘗入海求藥術精修煉白日飛昇境

有水旱盜賊禱之即應民德而祠之元至正間贈尚書屠順

重修闕

屠氏祖塋

先世自始祖邦彥公至四世祖德祥公累代積善德祥公卒葬時絕無地師于宅之隙地對城中天封浮圖頂而葬焉時目講僧適在此間周覽形勝見葬地龍穴砂水俱妙而又值佳日佳時因嘆曰此墳得穴得時所謂福人葬福地也羅盤為無用矣後至曾孫襄惠公瀟而貴顯屠雁湖雙柏廬遺聞

尚書墳

贈太子太傅吏部尚書草堂屠公子真之墓在江北上字河頭以墳旁長槽作上字點畫形故稱上字河此係襄惠公祖

四明談助

卷三

三

墓又有父松窻公墓亦在近方舊有漁浦門外院襄惠因造父墳遷院于對江城下即今之江心寺俱見屠氏先世見聞錄

屠氏舊宅 族望表見鑿橋第下所分支派俱采屠氏見聞錄

屠氏四世祖德祥公生子六長五俱再傳無後因分為四支次士實公子華一傳為教授秉彜先生其後大司馬文端公興焉文端公粹忠傳見祝都橋尚書第下

屠教授秉彜先生琪

字廷實號復菴學者稱秉彜先生贈刑部尚書琛從弟篤于孝友先是父娶周無子以從子琮為後繼室楊生先生先生願以資與琮均之領成化辛卯鄉薦戊戌會試乙榜

授堂邑教諭歷九載遷安慶府教授

曹志

先生為宗長時待

子弟不苟從子襄惠公以吏部尚書家居值秋祭後至賁

之祭畢不許與享令侍坐終席其嚴重如此

屠氏家乘

三士直公子良三傳為少保簡肅公而副使東涯郡伯碧泉

二公繼之

贈尚書屠公琛

字廷贊號葵軒穎敏博洽事二親先意承志必得歡心貢

上春官選漳平教諭教子僑倬成進士僑既顯累贈刑部

尚書

詳曹志

少保刑部尚書屠簡肅公僑

建第于江北舊宅旁

字安卿號東洲中正德辛未進士以才授御史出巡居庸

四明談助

卷三

四

關時承平日久武備俱廢公至周覽關險愾然曰此國家

之北門也因繕治城堡障隧實軍伍火器嚴舉刺諸邊將

常若臨大敵同事多謂公喜事公不為止歷遷至南京刑

部尚書調北部轉左都御史自公執邦憲益以風裁自持

諸御史無敢犯者嘉靖乙未元日大霧木盡冰占曰災在

大臣是日公感疾不起上痛惜謚贈葬祭甚厚自後欲用

都御史輒問曰能如屠僑否其見重乃爾所著東洲雜稿

南雍稿

詳著舊傳

屠副使倬

字文卿號東涯簡肅公弟嘉靖癸未進士歷官江西按察

副使

屠氏宗譜

公少與簡肅公同塾讀書名譽伯仲時稱江北



二屠性喜飲解官歸建滄洲別墅環植花木中藏圖書酣歌自適忘其爲憲副也春日偶具袍服獨自在花下暢飲一田夫過而睨之公曰爾不識耶我花神也百花盛開恐風姨作惡在此珍護隨以杯酒酌之其雅韻如此雙柏廬遺聞東涯公會孫女印姐適陸氏夫殘暴特甚而能不怨其夫儀部公作傳稱爲女聖

### 屠郡伯大心

字國同號碧泉簡肅公姪官生歷官貴州都勻府知府屠氏宗公解組歸傍簡肅公墓構屋數楹酣歌自適所言未嘗及世事後遷居城西芳嘉橋與同里數公爲詩社杯酒往還唱酬甚永壽八十有四雙柏廬遺聞

### 四明談助

### 卷三

五

四士元公子真二傳爲柱國太傅襄惠公而銓曹樾涯司馬竹墟太守幽叟鎮撫禹銘駕部烈愍數公繼其後

六士厚公子阜三傳爲儀部赤水先生而配楊夫人女湘靈子婦沈七襄一門唱和傳爲盛事太傅以下諸傳見城中第屠贈公濬

字朝文號丹溪儀部公隆之父也以子貴贈文林郎松江府青浦縣知縣屠氏宗譜公業漁而敗家故中落意常豁如理

藥草數畦啖其苗晨起未飯徐睨突無烟而步江上觀漲家人挽之曰觀漲可得食乎公笑曰不觀漲亦何可得食卒觀漲有二賈以巨櫝求寄載至公居步所舟人發之皆珊瑚犀象玳瑁香藥也曰是禁物當入官又當死賈陰造



倒其橐不悔每日中提壺出酒家貰酒飲博者率博至夜半時角勝爭道關其隣隣人俱苦之亦能醫嘗治人病得奇中有石橋黃生者病甚殆強載往治已就寢見人壁上詩卽和之繞榻行謳聲至旦主人以爲怪不服其藥嘗過張大司馬司馬客包參軍與論詩不合閱其坐坐客俱左袒包山人不爲下獨與所交東籬朱近臣最善近臣豪兩人並行市中輒駭市中人兩人若無人焉者然兩人論詩爭短長亦大闕退卽交相服不容口未幾近臣以醉溺死山人哭之慟有故人沈問之爲繫令山人獨從一門人王生訪之六月走馬萬山中中暑去繫百里而病卒休寧令知其名爲斂沈嘉則先生錄其遺詩百六十一首名月漁

四明談助

卷三

七

詩草行于世亦精祿命嘗自刻死期在龍集戊辰歲得年六十三至入黥歲果戊辰垂死謂門人曰古人旅葬裸葬無不可何必故鄉沈問之聞其言爲買山休寧東門外東

嶽廟之東南葬山人客過無不拜詩人盧九墓者

詳耆舊傳

朱東籬應龍與沈明臣葉太叔盧澐齊名號明州四傑乘月飲海上大醉溺死其短歌行云皎皎月明駕言宵征惟君之故不遑自寧說者以爲近于識也

靜志居詩話

江北董氏 族望表董氏亦稱孝子之後戶部主事守諭一望董文學世登

字善如性至孝爲諸生有名少工詩喜爲奇句世居甬江干園廬花竹家有藏書客至剪韭擊鮮欣然也以其學世

授子守諭官戶部主事是爲次公先生孫道權卽吾友巽子也遺詩數卷藏于家被火失傳耆舊傳

### 董戶部守諭

字次公漢孝子黯之裔由慈谿徙鄞曾祖瀾祖曄父世登公以孤身自奮志于學天啓甲子舉于鄉七試南宮不第然達官高第海內庸有不知而無不知甬上董次公者江東初建李司農白春譙政府以戶部貴州司主事召之當是時孫嘉績熊汝霖二公皆諸生不知兵迎方國安王仁二帥拱手而授之國成方王旣自專反惡諸公之參決而分餉分地之議起有旨會議方王司餉者皆至殿陛譁然公厲聲進曰公等今日所爲何事而不爲咫尺天威地乎于是跪

### 四明談助

### 卷三

八

奏王前曰分餉分地非也當以一切正供悉歸戶部覈兵而後給餉覈地而後酌給之先後所謂義餉者雖有其名不可爲繼義兵食義餉是散遣義兵之別名王以爲然方王諸帥雖怒無以難也無何王帥請塞鄞之東錢湖爲田又請稅人法又請官賣大戶祀田三疏旣上公持不可王帥亦迫大義而止丙戌三月十九日思陵大祥廷議寂然公請朝堂哭臨三軍縞素君子以爲知禮江東內附掃軌著書一日翁洲破張相國之俘入其孤欲還里無有爲之保者公作而曰此吾事也入言于監司公之干涉當道者二十年中唯此而已公心苦易學聚古今言易數十家考其異同所著有讀易一抄二抄卦變考畧易韻補遺春秋

簡秀集今僅存公車錄董戶部擘蘭集藏于家子道權諸

生詳南雷文定墓志

書董次公擘蘭集後續者舊傳序見鮒埼亭集

明季遺民之盛莫如甬上甬上諸遺民詩莫如先生晉之陶唐之司空宋之方謝龔鄭元之楊戴尚不敢斥言質言之而先生之稱情而出恣其所欲道者斯爲西山易暴之歌以後所未有也此其所以爲石齋先生高弟歟竹垞謂先生詩不肯寄人籬下然于風雅尚稍遠予觀其所錄先生詩乃甚不經意之作疑未見本集者以此知持論之難

先生學極博於治易尤精其辨女媧文一首極闢謂世本

四明談助 卷三

九

天皇庖犧氏弟女媧初分汝水之陽後爲天子因稱女媧本丈夫也古文汝作女媧亦通媧自蕭何不能抗呂雉之專政審食其叔孫通等妄謂古者女媧爲天子以媚之唐武氏篡位遂新女媧廟楊炯撰碑妄引蕭審之語不知汝皇之本非女后也王仲王曰女皇太昊氏之弟也世圖爲婦人之形蓋言其本非婦人而世謬圖之也記之以杜夫後世司牝者藉口焉先生此文可謂前人所未及 次公六烈士論亦附續者舊傳後

高鼓峯曰先生無日不讀書嘗于蕭晨過之雙扉未啓予從門隙窺焉名花怪石掩映于叢薄中橫一小几香烟縷縷劃然有繙書聲以爲神仙中人也

張隱君逸字遺民高秋甫之壻諸生其畫得秋甫之傳兼  
精篆學其鏤雕私印足與徐錦衣聖思齊石先生與董次  
公天鑑二戶部最相契次公手書所著擊蘭集一卷特乞  
先生署篆其首曰助忠孝人不可預也天鑑亦稱先生爲  
臥龍

勾餘土音擬薤露詞

袒元倩

董戶部任癘

人固不易知雷同洵可嘻諸公袒鯤庭老夫獨自袒元倩  
元倩死方知巨眼有先見爲思元倩節老夫有鼎敢自踐  
詩話次公先生不喜與人從同陸鯤庭陳元倩二人之  
爭浙東名士皆袒鯤庭而戶部獨袒元倩其時先生亦  
未深知元倩也特惡人之苟同耳及鯤庭以乙酉死節  
丙戌元倩繼之先生乃曰吾今可以謝鯤庭矣

貞孝先生董道權

字巽子一字岳堂戶部郎守諭子也諸生能詩雅爲臬堂  
所推嘗曰吾黨才華之秀發如張次英與巽子而已巽子  
善事父其卒也同人私謚爲貞孝好交方外木陳之召而  
歸也欲造樓以藏御書巽子諧之云憶自風飄去北遊歸  
來便建御書樓而今不作新蒲哭一任煤山花鳥愁嗣法  
木陳者持刀欲殺之巽子跳而免巽子父次公司農失職  
家居四方之至甬上者必以次公爲歸談笑宴集仍其舊  
時然而落莫已甚杯漿爵酒皆巽子心營手治父無失歡

次公三年伏枕茶鐺藥裏未嘗失職母陳孺人當喪亂之際北堂萱草不減春暉皆其至性也所著缶堂學詩缶堂學文炳燭集墨傭集旅牕隨筆藏于家

續者舊傳

### 董文學孫符

字漢竹一字姚江諸生道權長子也江北董氏自明季顯次公戶部稱北董別以天鑑戶部爲西董及兩家子弟在證人講社亦以西董北董別之至是蓋三世矣姚江稱北董而天鑑長孫且菴稱西董于通家兄弟中二人最長各有詩名姚江爲錢徵君螿菴婿及與諸前輩唱酬遨遊閩粵之間所至皆有集其人朴直厚重詩亦如之

續者舊傳

### 董文學胡駿

## 四明談助

## 卷三

十一

字周池一字南田諸生道權次子也其人醇雅修潔翩翩梧竹之選終日焚香嘯咏顧舌耕者四十年而晚歲卒以貧死圖書散失少弟孫籥收其遺詩江北董氏自次公先生後扶輪大雅者三世今漸不可問矣

續者舊傳

### 董文學師儒

字若舒號扶輿江北同族漢孝子之裔母病兄盲竭蹶侍養母亡未斂會隣家失火于烈焰中負母屍出復掖兄行不攜一物家乃益貧欽旌屢辭不赴給廩餼終身

三補者舊傳

### 董陽曲世英

字天培號甬干漢純孝徵君之後祖繼泉尚義好施父景卿名諸生公賦姿英異登康熙辛酉賢書謁選得太原之

陽曲邑當省會最衝繁公性勤敏凡上官所檄事不移時立辦若義有不可則毅然諫阻不少阿汾河流駛渡者時遭覆溺公創建橋梁民不病涉以年老乞休致仕歸里後舊廬讓與諸姪而別築一室以居子二大呂江西武寧知縣大縉郡庠生皆工詩文

三補晉舊傳

### 桃花渡李氏

桃花渡黃飲飛斬蛟事已見飲飛廟碑記李氏自稱自奉化江口乘花堂來乾隆初以貿易起家至今財丁兩旺科貢不斷兼出武將有大房子八座已燬其二

李琪字文瀾乾隆辛卯科右榜舉人由浙江水師歷任至黃巖遊擊于乾隆五十八年間拏獲石版殿燒廠巨盜高阿

### 四明談助

### 卷三

十一

片等九人并船隻器械浙閩總制覺羅具奏正法隨蒙奏補玉環叅將檄委統領水師官兵先後獲得巨盜翁衡沈鰲王杜等人船并割取首級無數總制魁具奏歷陞臺灣水師副將至嘉慶三月五月再陞江南蘓松總鎮正在交卸值洋匪蔡牽直犯臺口追捕舟甫及淡水港颶風陡作盜脫不得獲提帥哈以故縱劾奏遂革職拏問至事直隨征教匪歷陞復職而疽發病革矣卒五十六歲

家傳

李鎮國

行伍出身歷任乍浦左營守備

李春杓

行伍出身現任黃巖千總

李雲軒

嘉慶初廩貢捐訓導

李雲五

嘉慶間廩貢捐訓導

李黃琮

嘉慶庚午歲貢

李雲球

嘉慶戊辰歲貢

李為崇

乾隆甲寅恩科舉人  
次年會試場違法被黜

李志綱

嘉慶丙寅歲貢



李震

嘉慶戊辰科順天舉人  
選授江蘇無錫縣知縣

李塤

震弟由教習授山東  
東昌府司獄司

李庭蘭

捐授曲江  
縣夢里司

### 引仙橋名義

桃花渡北去孟陽橋二十餘步有引仙橋南接吳學士惠里  
北聯屠司寇僑宅故名敬止錄屠莘農先世見聞錄云案少保  
簡肅公少師事吳北川太常奈使君廟前有橋師弟常行其  
上後同舉正德辛未進士里人因名其橋曰引仙橋高隱學  
之言尚未盡

### 許孝子免雷擊

許孝子敬觀明初明州衛兵事母至孝一日與同伍十人駕  
舟販鹽至江北渡忽暴風雷電擊舟中人上泥塗衆皆震死

### 四明談助

### 卷三

七

敬觀昏絕默念我死母將誰依忽若有人援之去衆死所三  
丈許而甦雷火燎髮如禿人以爲孝行之報聞志  
名人詩歌總列

### 屠幽叟甬東江北歌

春樹重重春日和春江九曲抱城過龍頭直接桃花渡燕尾  
斜穿上字河 迢遙沙埠是梅墟面面澄江儘可廬不盡石  
帆奔海月春風曬網稻花魚 百十魚鮮下海門布帆五色  
若雲屯甬東北岸鄞江上習習腥風五月繁 犁鋤荷鍾種  
春苗蠶豈花開春正饒十里清溪鴨寨堰萬株蒼檜麥陽橋  
桑柘林中綠漸敷村村花暝喚提壺江風日冷忘歸去猶  
有斜陽滿雁湖 夫差破後已亡吳曾說清江駐舳艫惟有

輅林猶似昔千門落日自啼烏

李杲堂竹枝詞

夜來莢雨灑東皋任處春田可種苗恰是江村好時節麥花  
風過麥陽橋 三江水合夾靈橋形勢無如此地饒九十九  
墩蟠岸北一墩翔處半乘潮 渡口尋春路不迷管絃樓下  
綠楊絲尋常留客都教住唱得當年柳七詩  
句餘土音訪柳屯田遊冶巷

屯田不羈人冶春恣遊屐妙寫烏絲詞雕以薄金葉女兒百  
輩隨如花環以蝶畏涼添半臂迎風揮團箑興來輒畫眉醉  
後或傷屬當時有清議頗共訝褻媒顧聞鹽場課會稽罔不  
協乃知雖放浪亦自克整攝曉峯何峩峩江樓何浹浹留客

四明談助

卷三

十四

唱驪駒花柳紛稠疊有情天亦醉伊川爲心惛

袁陶軒鄮北雜詩

江湖趨艮亂流東江北相傳地勢雄墩井空留九十九一墩  
一井落江中 吳公故宅鴈湖濱曾侍經筵啓沃勤寂寞青  
林原上路至今人說太常墳吳太常惠墓在縣北十里青林  
原上見嘉靖志 董氏多賢振故簪司農聲望重東林閉門  
獨自研三易應識艱貞晚歲心 奈君廟貌肅江干入海能  
成九轉丹擬向仙宮乞僊藥引僊橋去路漫漫 顏公渠內  
水流澌東望錢家舊有隄曲榭春歸何處去野桃零亂夕陽  
西錢太僕璫世居梅江瀕江築長隄稱錢公塘見聞志春風  
歸曲榭桃落滿前除吳丞相咏占春亭詩 蟪蛄廟前春水

生蛛蜘蛛墩上春雲平一路春風留客住玩江樓外管絃聲柳  
耆卿嘗監定海曉峯鹽場有長短句名留客住刻石廨中若  
江北岸之花柳巷管絃樓皆其所素游地故又有玩江樓詞  
見嘉靖志 吐光蟹小滿含膏點酒真堪饜老饕好餉東坡  
老居士爲言生嚼不須糟 紫蛤不如黃蛤美蠶蝦爭似梅  
蝦肥一甌買得雙魚醉日日江頭看落暉 滾滾江濤走白  
沙麥陽南望是桃花郎舟若渡桃花去秋雨梧桐認妾家一  
枕新涼眠客舍聽梧桐疎雨秋風戰宋劉改之贈明州老妓  
詞也見游宦紀聞